

ثابرات ن بُولوس اِ اِرومانيين

ثامزواروث

1 بُولوس، اِسْمَع ن يَشُو لَمَسِيح، اَمَازان اِتوالاغان، اِتواخوز اِ لَخْبَار اَصْبَحان ن اَرَبِّي،
 2 لَخْبَار اَصْبَحان وِني اِزَار اِواغذ زَايس س اِمكاشافن نَس ذَكْ اِذْلَيْسن اِقْدَسن،
 3 لَخْبَار اَصْبَحان خ مَيْس وِني اِ د يُوَسِين زِي زَارِيَعث ن داوُد زِي جِيَهْت ن وِشُوم،
 4 ماشا زِي جِيَهْت ن اَرُوح ن نَقْدَاسْت اَقَا نَتَا اِتواسِبِين ذ مَيْس ن اَرَبِّي س جِهْد زِي
 نُوَكرا نَس زَك اِمْتِينن: يَشُو لَمَسِيح سِيذِيَتْنَع. 5 اَقَا زَايس اِ نَطْف نِيَعْمْت ذ نازانت
 (=لخدمت ن اَمَازان)، جِيما مارا لَكْنُوس س اِ اِيْمان اَذ طَاعن اِ اِيَسَم نَس. 6 اَقَا كَنِيو،
 اِنِّي اِتوالاغان زِي يَشُو لَمَسِيح، زَايسن اِ نَلَام عاوذ. 7 غار مارا اِمعِيَز ن اَرَبِّي اِنِّي اِلان
 ذِي رُوما، اِنِّي اِتوالاغان ذ اِمَقْدَاسن: نِيَعْمْت ذ لَهْنا اِ غاروم غا اِلين زِي اَرَبِّي بابانْتغ ذ
 زِي سِيذِي يَشُو لَمَسِيح.

بُولوس اِتُوخَش اَذ يارزف غار رُوما

8 اَمزوار تَشْكَارغ اَرَبِّي اِنُو س يَشُو لَمَسِيح زِي جِيَهْت نُوَم مارا، مِينزِي اِ اِيْمان نُوَم اَرَبِين
 اَس-د لَخْبَار ذِي دُونِث مارا. 9 اَرَبِّي، وِني عَبْدغ س اَرُوح اِنُو ذِي لَخْبَار اَصْبَحان ن
 مَيْس، اِشْهَد خافي مامَش كَنِيو تِيضارغ نَبْلا اَبْدِي ذِي تَرالِيَتِين اِنُو، 10 تَرالِيغ لَبْدا، ما
 اِزَمار لَخُو اَذ اِلِيَق اِج ن وُمُور س اَراي ن اَرَبِّي اَذ غاروم-د اَسغ. 11 مِينزِي وِخَشغ اَذ
 كَنِيو زارغ جِيما اَذ اوم وِشغ شان ن تَمُوشا ن نِيَعْمْت ن اَرُوح اِ ذ اوم غا اِوشن جِهْد،
 12 جِيما اَذ نَتواسْتَفُوج جارانغ س اِ اِيْمان وِتي ذايِنغ، اِ اِيْمان نُوَم ذ وِتي اِنُو. 13 ماشا وار
 خَسغ شا وار تَسْنَم، اِ اَوْمانن، بَلِي اَطاس ن اِمُورن كَنِيغ اَذ غاروم-د اسغ، جِيما اَذ غاري
 ثِيَلِي لَغِيَلْث ذايُوم عاوذ، اَمَشناو ذِي لَكْنُوس نَضْنِي، ماشا اَل اَس-ا عاذ وار زَمارغ اَذ
 د اسغ. 14 نش ذ بُو-وَمارواس اِ اِيونانِيَسَن ذ اِباربارِيَسَن، اِ اَيْث ن ثِيغِيْث ذ اِقُوبانِيَسَن. 15 خ
 وِني اَقابِي وِجذغ اَذ كَنِيو بارغ س لَخْبَار اَصْبَحان وِلا اِ كَنِيو اِ اِلان ذِي رُوما.

جَهْدَن لَخْبَارَ اَصْبَحَانَ نِيشُو لَمَسِيحِ

¹⁶مِينزِي وار تَصْضِيعِغِ شَا س لَخْبَارَ اَصْبَحَانَ نِ لَمَسِيحِ، مِينزِي نَتَا ذ جَهْدَن اَرِّي اِ
وُسْنَجَمِ نِ مَارَا وَي يَوْمَن، اِ وُذَايِ اَمَزُورِ خَنِي اِ وُيُونَانِي. ¹⁷مِينزِي ثَا سَكْدَا نِ اَرِّي اَقَا
ثَبَانَ ذَايسِ ذِي لِانْجِيلِ زِي لِاِيْمَانِ غَارِ لِاِيْمَانِ، اَمَ مَامَشِ ثُورَا

”ماشَا اَمَسْكَادِ س لِاِيْمَانِ اَذِ اِدَار.“ هاب. 4:2

لِغَضَابِ نِ اَرِّي

¹⁸مِينزِي لِغَضَابِ نِ اَرِّي اِ ذِ اِبَانِ زَكْ وُجَنَّا خِ مَارَا لِقَجَا حَتْ وُ خِ مَارَا مِينِ وار
اِسْكَدَنِ ذَكْ اِوْذَانَ اِنِّي اِسْذُولِيْنِ ثِيذَتْ سِ مِينِ وار اِسْكَدَنِ. ¹⁹مِينزِي مِينِ اِزْمَارِ اَذِ
اِتْوَاسَنِ زِي اَرِّي، اِتْبَانَ ذَايسَن، مِينزِي اَرِّي اَقَا اِسْشَنِ اَسَنِ ث-يِد. ²⁰مِينزِي زَكْ وَا مِي
ثَنَوَاكْ دُونِيْتِ، ثِيْمَسْلَايِيْنِ نَسِ وار تُوَازَرَنْتِ زِي مِينِ زَايسِن-دِ اِتْوَاخْلَقَن، جَهْدَن نَسِ
نِ لَبْدَا ذِ ثِيْفِرَاسِ نَسِ نِ اَرِّي، اَقَا تُوَازَرَنْتِ سِ لِعْلَقِ زِي لِخُذَايِمِ نَسِ اَلَامِي نِيْتِي وار
غَارَسِنِ بُو سَمَا حَتْ، ²¹مِينزِي، وُ مِي سَنَنْ اَرِّي، وار ثِ سَعُولَنْ نِيغِ وار ثِ شَكَارَنْ اَمَ
اَرِّي، ماشَا ذُولَنْ ذِ اِبُو هَالِييْنِ ذَكْ اِخَارِيصَنْ نَسِنِ وُ شَا وُلِ نَسِنِ اَفْعُولِ اِبَارَشِن. ²²وُ مِي
حَسْبِنِ اِخْفِ نَسِنِ ذِ اِمِيغِيْسِنِ ذُولَنْ ذِ اِفْعَالِ ²³وُ شَا بَدَلَنْ اَعُولِي نِ اَرِّي وُ نِي وار اِفْتِيْنِ
سِ مِينِ يَارُوسِنِ ذِي صِيْفَتْ نِ بِنَادِمِ اِفْتَانَ: اِحْضَاضِ ذِ لِحَايَا وَا نَا ثِ سِ اَرْبَعَا نِ اِحْضَارَنْ
ذِ مَارَا لِحَايَا وَا نَا ثِ اِنِّي اِتْبُوعَنْ خِ ثَمُورْ.

²⁴خِ وُ نِي اِسْلَمِ اِثْنِ اَرِّي عَاوْذِ غَارِ لَخْمَجِ سِ نَشَوَا ثِ نِ وُ لَوَانِ نَسِنِ جِيْمَا اَذِ
سَفْضَحَنْ اَرِّي مَاتِ نَسِنِ جَارَاسِن. ²⁵اَقَا نِيْتِي بَدَلَنْ ثِيذَتْ نِ اَرِّي سِ وُ خَارِيقِ، عِبْدَنْ وُ
خُذْمَنْ اِمِينِ ذِ اِتْوَاخْلَقَنْ سَنَجِ اِ وُ نِي اِخْلَقَنْ وُ نِي وُ مِي غَارِ ثَلَا لِبَارَا كَا اِلْبَدَا قَاعِ. اَمِينِ.
²⁶سِ وُ نِي اِسْلَمِ اِثْنِ اَرِّي غَارِ اَشَاهِي اِنْفَضَحَنْ، مِينزِي وُ لَا ذِ ثِيْمَغَارِيْنِ نَسِنِ بَدَلَنْتِ اَبْرِيذِ
نِ طَبِيْعَتْ سِ مِينِ وار اِلِيْنِ ذِ طَبِيْعَتْ. ²⁷اَمْنِي اِرِيَا زَنْ عَاوْذِ جِيْنِ ثَا مُونْتِ عِلَا حَسَابِ
طَبِيْعَتْ اَكْ-ذِ ثَمَغَارِيْنِ، ذَعْقَنْ سِ نَشَوَا ثِ اَكْ-ذِ وَايَا وَا، اِرِيَا زَنْ اِتْكَنْ لِفَضَايِحِ اَكْ-ذِ
يُرِيَا زَنْ، قَبْلَنْ ذَكْ اِخْفِ نَسِنِ لُمُونْتِ اِ اِسْذَاهَلَنْ اَخْطُو نَسِنِ.

²⁸اَمَ وار خُسْنِ اَذِ قِيْمَنْ اَذِ سَنَنْ اَرِّي، اِسْلَمِ اِثْنِ اَرِّي غَارِ لِعْلَقِ وار اِشْنِيْنِ جِيْمَا اَذِ
كَنْ مِينِ وار اِعْدَلَنْ، ²⁹عَمَّارَنْ سِ مَارَا مِينِ وار اِسْكَدَنْ، سِ ثَوْقَحِيْبِثِ ذِ لُغَارِ ذِ طَمَعِ ذِ
ثُوعَفْنَا وُ لَا سِ لِحَسَدِ ذِ وُنْقِي ذِ وُ مَنَغِي ذِ ثَحْرَايْمِشْتِ ذِ لِقَبَا حَتْ، اَقَا نِيْتِي ذِ اِخْوَا وَا جَنْ
اِنِّي اِتْعَاوَا ذَنْ لِحُبُورَا ثِ، ³⁰ذِ اِنِّي اِسْأَوَالَنْ سِ لُغَارِ ذِ اِمَشَارَهَنْ نِ اَرِّي ذِ اِمْغِصَابِنِ ذِ

إمعفانن ذ آيث بو-وؤقوم ذ إمسوفغن ن ثوعفنا ذ إني وار إطيعن إ لواليدن،³¹ آقا نيثني
 تبال لفهامت وُلا ذ تصديقت وُلا ذ لحنونشت وُلا تبالا أصلاح ذ أرحث.³² وآخا نيثني
 سنن لحوكم إسكذن ن آرثي، بلي إني إتكذن آيا سذاهلن لموث، آقا نيثني وار تكذن مان
 آيا واهما، ماشا أرتان عاوذ خ إني ث إتكذن.

لحکامث إسکذن ن آرثي

2¹ خ وُبيي آقا شك تبالا سُماحت، أ بنادم، كُول إجن وني إحكمن، مينزي ذي
 مين ثحكمذ خ ونضني، ثنحاسابذ إخف نك. مينزي شك وني إحكمن، ثتكذ
 ثيمسلاين نني سيمانت ننت. نثنين نسن بلي لحوكم ن آرثي ذ ثيدت خ إني إتكذن
 مان آيا.³ ما ثثغيلد آيا، أ بنادم، وني إحكمن خ إني إتكذن ثيمسلاين-ا وُشا وُلا ذ شك
 ثتكذ ننت، آقا ما ثرمارذ أذ ثارولذ زي لحوكم ن آرثي؟⁴ ما نثسحقاراذ أكر ن ثشوني نس
 ذ تاسيع ن وُراجي نس ذ تاسيع ن لخاضار نس وُشا وار ثسيند شا بلي ثشوني ن آرثي
 آقا إنده إ شك غار ثوبث؟⁵ ماشا ذي سبيث ن ثغانت نك ذ وُل نك وار إتوبن، ثباروذ
 إ يخف نك لغاضاب ذك واسن ن لغاضاب، خمي إ دغا إضهار لحوكم إسكذن ن
 آرثي،⁶ وني إغا إخلصن كُول إجن علاحساب لخدایم نس: ⁷ إيني إتصبارن ذي لخدایم
 إصبحن وُشا أرون أعولي ذ شان ذ مين وار إفنين، آقا أذ اسن إخلص س ثوذارت ن لبدا،
⁸ ماشا إيني يارزون إمشوبشن، إني وار إطيعن إ ثيدت، ماشا ضفانن إ مين وار إسكذن،
 آقا أذ اسن إخلص س ثفحات ذ لغاضاب. ⁹ لخصارت ذ صبيقات أذ اسنت خ كُول لعمار
 ن بنادم إ إتكذن لغار، خ وُذاي ذ أمزوار خني خ وُيوناني،¹⁰ ماشا أعولي ذ شان ذ لهنا أذ
 إين إ مارا وي إتكذن ثشوني، إ وُذاي ذ أمزوار خني إ وُيوناني،¹¹ مينزي آرثي وار إتكذ بو
 لغارز.¹² مينزي مارا وي إغا إحصان تبالا تاوراث، تبالا تاوارث أذ إتواهلک وُشا مارا وي
 إغا إحصان سادو تاوراث، آقا س تاوارث أذ إتواحاسب،¹³ مينزي وار إلي إني إتسلان
 إ تاوارث نيثني ذ إمسكاذن غار آرثي، ماشا إني إضفانن تاوارث آقا نيثني أذ تواسكذن.
¹⁴ مالا لکنوس إني وار غار إلي بو تاوراث، تکذن س طبعث مين ذابس ذي تاوراث، آقا
 پينا ذ تاوارث إ يخف نسن، وآخا نيثني وار غارسن بو تاوراث.¹⁵ آقا نيثني سشانن بلي
 لخدمت ن تاوارث ثورا ذك وُلاون نسن، أم تشهد عاوذ ثنفسشت نسن وُشا إخاريصن
 نسن ذلمن وُلا تدافعن خ إخف نسن جاراسن¹⁶ ذك واسن مين ذي إغا إحاسب آرثي
 خ مين إتوفارن ذك إوذان س يشو لمسيح علاحساب لخبار أصبحان إنو.

وُذاي ذِ تاوِراث

17 اقا شك، وني اِتواسمان وُذاي، تُسنادذ خ تاوِراث وُشا تُسمغارذ ذي اَرَبِّي، 18 تُسند مين اِخس نتا، اقا تُفازرد مين اِصِبْحن، تُتواسلمدذ زي تاوِراث، 19 تُحاسبذ اِخف نك ذ اَمكُواذ ن اِذارغالن ذ تُفواون ن يَنِّي اِلان ذِي ثالست 20 وُلا ذ اَمسكُم ياربان اِبُوهااليين ذ اَمسلماذ ن اِقوبانيين - اقا غارك صيفت ن مُوسنا ذ تُيدت ذِي تاوِراث -، 21 اوا شك وني اِسلماذن اِنصني، ما وار تُسليميدذ شا اِخف نك؟ شك وني اِتبارحن 'وار تيشار'، ما تشارذ؟ 22 وني اِقارن 'وار زني'، ما تُرنيذ؟ ذ وني اِشازهن لاصنام، ما تشارذ زاوشن نس؟ 23 شك وني اِسْمِغارن ذِي تاوِراث، ما تُفصَحذ اَرَبِّي وُمي تُخضيد ذِي تاوِراث؟ 24 مينزي خ سبيت نوم اِتواسقَف ذك اِسْم ن اَرَبِّي جار لَكُنوس اَم مامش نُورا. 25 اقا اَخْتان اِنَع مالا تُضْفارذ تاوِراث، ماشا مالا تُنْعديذ خ تاوِراث، اقا اَخْتان نك اِذول نَبلا اَخْتان. 26 مالا وني نَبلا اَخْتان اِتْطَف ذِي لومار اِسكُذن ن تاوِراث، ما وار اِحسب نَبلا اَخْتان نس ذ اَخْتان؟ 27 ذ وني اِتْكُن تاوِراث، واخا نتا نَبلا اَخْتان علا حساب طيبعت، ما نتا وار شك اِتْحاساب شا وُمي تُعديذ خ تاوِراث واخا شك س لِحارف ن تاوِراث وُس وُخْتان؟ 28 مينزي وُذاي وار اِلِّي ذ وُذاي س وُذم واه، وُلا ذ اَخْتان وار اِلِّي ذ اَخْتان س مين اِتبانن ذك وِسوم واه، 29 ماشا نتا ذ وُذاي وني اِتيلين ذ وُذاي ذِي لا لاغ (=ذك وُل) وُنتا س وُخْتان وني ث اِتيلين ذك وُل س اُرُوح، وار اِلِّي س لِحارف ن تاوِراث، خني اقا اَسْمِغار نس وار د اِتيس شا زك اِودان ماشا زي اَرَبِّي.

لِفْضَل ن تاوِراث اِ وُذايِن

3 اِ خني، مان لِفْضَل غار وُذاي، نيغ مان تيزي ن وُخْتان؟ 2 اَطاس خ كُول اِغزُديسن! خني غار وُمزوار موشن اَسْن واولن ن اَرَبِّي. 3 مامش، مالا تُوغا شا زايسن وار وُمينن شا، ما خني اذ اِتوابضل لامان ن اَرَبِّي، مينزي نيثي وار وُمينن شا؟ 4 عمارص، ماشا اذ بيلي اَرَبِّي ذ تُيدت وُشا كُول بناذم ذ بُو-بيخاريقن، اَم مامش نُورا

”جيما اذ تُتواسكُذ ذك واولن نك

وُشا اذ تُعْلَبذ خمي اِ غا توحاسبذ.“ سح. 4:51

5 مالا مين وار اِسكُذن ذايغ اقا اِسببن تاسكُذا ن اَرَبِّي، مين اِ غا نيني عاذ خني؟ ما اَرَبِّي وار غارس بُو لِحَق، نش ستاوالغ اَم بناذم، وُمي خانغ اِكْنا لغاضاب نس؟ 6 وار

خاس نسيويل. مامش اِ غا اِحاسب اَرَبِّي دُونِيث لَخَذَنِي؟⁷ مامش مالا تَفِيصُ ثِيذت ن اَرَبِّي غار وُغُولِي نَس س وُخَارِيق اِنُو، مايي عاذ اِ غا تَواحاسيغ اَم وُمدنوب؟⁸ اِ مايي وار نَيي، اَم مامش خانغ سَخارِيقن وُشا اَمشناو مامش شا زايسن قارن بلي نشين نقار ”اَذ نَك تُوغفنا، جِما اَذ زايِس-د تِك تَصَبحانت“. اَقا لُحوكم خاسن س لِحَق.

وُلا ذ اِجَن اِتسَكْد قِيبالْت اِ اَرَبِّي

⁹ اِ خَنِي مامش؟ ما نشين حسن؟ لا اِعمارص، مينيِزِي قِبَل اَقا نَضَلَم اِثن س ثنائِن اِذسن، وُذائِن ذ اِيونانِيين، بلي نيشيني مارا ساذو دانب،¹⁰ اَم مامش ثورا

”وُلا ذ اِج وار اِلِي ذ اِمسَكَاذ،¹¹ وُلا ذ اِج وار اِفَهَم،

وُلا ذ اِج وار يارزو خ اَرَبِّي.¹² مارا فَعن زَك وِبَرِيذ،

مارا اِذسن ذُولن وار نَفَعن شا،

وُلا ذ اِج وار اِتَكْ لَصرافت، وُلا ذ اِج. سِج. 3-1:14

¹³ توميجا نسن ذ اَنْضَل يارزمن، س اِلساون نسن شمشن،

سَم ن اِفِغران ساذو اِنشيشن نسن، سِج. 9:5، 3:140

¹⁴ اَقُموم نسن اِشور س نَعَلت ذ تارزو كِي، سِج. 7:10

¹⁵ س اِضارن نسن تَقْلِيقن غار وُسِيَزَل ن اِذامن،

¹⁶ اَرَبِّي ذ ثامارا ذَك اِبَرِيذن نسن،

¹⁷ اِبَرِيذ ن لَهنا وار ث سِينن شا اِشا. 8-7:59

¹⁸ وُلا ذ تِيكُوذِي ن اَرَبِّي وار ثَلِي قِيبالْت اِ تِيَطَاوِين نسن.“ سِج. 1:36

¹⁹ نشين نسن بلي مارا مين تَقَار تاوراث، اَقا تَقَار اِث اِ اِنِي اِلان ساذو تاوراث، جِما اَذ اِتواقن كُول اَقُموم وُشا اَذ ثَدول مارا دُونِيث ساذو لُحوكم ن اَرَبِّي،²⁰ مينيِزِي كُول اِيسوم وار اِتتواسَكْد شا زِي لَخَذايِم ن تاوراث قِيبالْت نَس، مينيِزِي س تاوراث تاس-د تُموسنا ن دَنوب.

تاسَكْدا س لايِمان وُخَدَس

²¹ ماشا لُحو اَقا تَضهار-د تَسَكْدا ن اَرَبِّي نَبْلا تاوراث، تَشَهْد خاس تاوراث ذ اِمكاشافن،

²² اَقا تاسَكْدا ن اَرَبِّي زِي لايِمان ن يَشو لَمسيح غار مارا ذ خ مارا اِنِي يَوْمِن، مينيِزِي وار

ذِين بُو لَفارز.²³ مينيِزِي مارا خُضان وُشا اِنقَص اِثن وُغُولِي ن اَرَبِّي²⁴ وُشا تواسَكْدن س

ثَمُوشِي ن تِيعْمَت نَس س وُفْكِي اِالان ذِي لَمَسِيح يَشُو. ²⁵ اَرَّبِي اِكَّ اِث ذ ثَاغَارَصْث
 ن وَصْلَاح س لِإِيْمَان ذَكَّ اِذَامَن نَس، حِيْمَا اَذْ ثَبَان تُسْكُذَا نَس، وُْمِي ثِن اِجَا اَذْ
 خُضَّان زِيْش اَوَّارِنِي تَابِيْع ن وُرَّاجِي ن اَرَّبِي، ²⁶ اَلْ اِذْ غَا ثَبَان تُسْكُذَا نَس اِضَا، حِيْمَا
 اَذْ يِلِي نَتَا ذْ اَمْسُكَاذْ وُلا خَمِي ذْ اِتَارَا ذْ اَمْسُكَاذْ وِي اِلان زِي لِإِيْمَان ن يَشُو. ²⁷ مَانِي
 اِلَا وُسْمَغَار؟ وَا ر خَاس نَسِيْوِيل. س مَان تَاوْرَاث؟ س مَان لِخَذَائِم؟ لا، مَاشَا س تَاوْرَاث
 ن لِإِيْمَان. ²⁸ خَنِّي نَحْسَب بَلِّي بِنَاذِم اَذْ اِتْوَاْسَكُذْ س لِإِيْمَان، تَبَلَا لِخَذَائِم ن تَاوْرَاث.
²⁹ نِيْع اَرَّبِي ن وُذَائِن وَاها؟ مَا وَا ر اِلِي ن لَكُنُوسْ عَاوُذ؟ وَاه، وُلا ن لَكُنُوسْ. ³⁰ مِيْنَزِي
 اَرَّبِي ذْ اِجَن وَنِي اِغَا اِتْوَاْسَكُذْ س لِإِيْمَان اِنِّي اِتْوَاخْتِنن ذْ يَتِي وَا ر اِتْوَاخْتِيْنن شَا. ³¹ مَا
 نَبْطَل تَاوْرَاث س لِإِيْمَان؟ وَايَاو، س لِمَقْلُوب، نَشِيْن اَذْ نَضَمَن تَاوْرَاث.

لِإِيْمَان ن اِبْرَاهِيْم

4 مِيْن اِغَا نِيْنِي خ اِبْرَاهِيْم، جَدِّيْتَنغ، مِيْن يُوفا عِلَاحَسَاب اَيْسُوم؟ ² مِيْنَزِي مَلا
 جَدِّيْتَنغ اِبْرَاهِيْم ثُوْغَا اِتْوَاْسَكُذْ س لِخَذَائِم، اَقَا غَارَس شَان، مَاشَا وَا ر اِلِي شَا
 غَا ر اَرَّبِي. ³ مِيْنَزِي مِيْن اِقَار وَذَلِيْس؟ ”يُومَن اِبْرَاهِيْم ذِي اَرَّبِي وُشَا اِتْوَاْحَسَب اَس-د ذ
 ثَاْسَكُذَا.“ ⁴ وَنِي اِخْدَمَن وَا ر د اِس ثَتْوَاْحَسَب شَا لَمُوْث خ لِحْسَاب ن تِيعْمَت مَاشَا خ
 لِحْسَاب ن وُمازَواَس مِيْنَزِي ثُورَسَن اَس-د. ⁵ مَاشَا وَنِي وَا ر اِخْدَمَن وُشَا يُومَن ذَكَّ وَنِي
 اِتْسُكَاذَن اَكَاْفِرِيو، اَقَا لِإِيْمَان نَس اِذْ اَس-د اِتْوَاْحَسَب ذْ ثَاْسَكُذَا. ⁶ اَمَّ مَامَّش اِقَار دَاوُد
 عَاوُذ سَعْدَن بِنَاذِم وَنِي وُْمِي ذْ اِس اِحْسَب اَرَّبِي ثَاْسَكُذَا تَبَلَا لِخَذَائِم

⁷ ”سَعْدَن اِنِّي وُْمِي اِتْوَاغْفَار وُخَطُو نَسَن،

اِنِّي وُْمِي اِسْذُولِي اَرَّبِي دَنْوَب نَسَن.

⁸ سَعْدَن بِنَاذِم وُْمِي وَا ر د اِس اِحْسَب شَا اَرَّبِي دَنْوَب نَس. “ سَبَح. 1:32-2

⁹ مَا سَعْدَا-خ يَتِي اِتْوَاخْتِنن وَاها نِيْع عَاوُذ خ يَتِي وَا ر اِتْوَاخْتِيْنن؟ س مِيْنَزِي نَقَّار بَلِّي
 اِتْوَاْحَسَب اَس-د اِ اِبْرَاهِيْم لِإِيْمَان ذْ ثَاْسَكُذَا. ¹⁰ مَامَّش ذْ اِس ث-يِد اِتْوَاْحَسَب؟ مَا
 لَامِي ثُوْغَا س وَخْتَان نِيْع مَلا ثُوْغَا تَبَلَا اَخْتَان؟ وَا ر ثُوْغِي س وَخْتَان، مَاشَا ثُوْغَا تَبَلَا
 اَخْتَان. ¹¹ وُشَا اِكْسِي لِعَلَامْث ن وَخْتَان اَمَّ وُشَمَّيْع ن تُسْكُذَا ن لِإِيْمَان وَنِي ثُوْغَا
 اِتْوَاْحَسَب اَس-د وُْمِي ثُوْغَا تَبَلَا اَخْتَان، حِيْمَا اَذْ يِلِي ذْ نَابَابَاث اِ مَارَا اِنِّي يُومَنن
 وُْمِي نِيْشْتِي تَبَلَا اَخْتَان، حِيْمَا اَذْ اِس-د ثَتْوَاْحَسَب تُسْكُذَا عَاوُذ، ¹² وُشَا حِيْمَا اَذْ يِلِي

ذ ثاباباٲ اِ يَني س وختان، وار اِلي اِ يَني اِ لان س وختان واهٲا، ماشا كُورن عاوذ ذك اِ سوراف ن اِ ايمان ن جدبئغ اِ ابراهيم وُمي تُوغا نَبلا اُختان. ¹³ مينزي لواعذ اِ ابراهيم نيغ اِ زاربعٲ نس بلي اُذ يبلي ذ اُوربٲ ن دُونبٲ، وارٲ اِ اكسي شا زي تاوارٲا، ماشا زي تُسكُذٲا ن اِ ايمان. ¹⁴ مينزي مالا اِني زي تاوارٲ ذ اُوربٲن، اُقا اِ ايمان اِ خسارن وُلا ذ لواعذ اِ بصلن. ¹⁵ اُقا تاوارٲا نئالو لغاضاب، خني ماني وار ثلي تاوارٲا، وار ذين اِلي وُلا ذ اُخطو. ¹⁶ س وُيني ثيبلي س اِ ايمان، جيما اُذ ثيبلي س نيعٲ، ماحنذ اُذ يبلي لواعذ نيشان اِ قاع زاربعٲ، وار اِلي اِ يَني اِ لان زي تاوارٲا واهٲا، ماشا عاوذ اِ اِني اِ لان زي اِ ايمان ن اِ ابراهيم، وني ذ ثاباباٲ ن مارا اِ ذنغ، ¹⁷ اُم مامش تُورا ”اُقا كُيغ شك ذ ثاباباٲ اِ واطاس ن لكُوس“ زاث اِ اربي وني زي تُوغا يُومن نئا، وني اِ سنكارن اِ مئبٲن ذ وني اِ تلاغان مين وار اِ لين اُخمي اِلا. ¹⁸ وَاخا اِ قضع اس لاياس، اُقا يُومن س وُسيٲم، جيما اُذ اِ ذول ذ ثاباباٲ اِ واطاس ن لكُوس اُم مامش اِ توانان

”اُمو اِ غا ثيبلي زاربعٲ نك“ . اُمز. 5:15

¹⁹ اِ ايمان نس وار تُوغي اِ ضعف، اُقا نئا وار ذ ياربي شا ثاببٲ وُمي ذ ذُول اُريمٲ نس ثمُوث اُم تُوغا غارس علاحال ميٲا ن اِ سكوُسا، وُلا وُمي اِ مُوث وُعديس ن سارا. ²⁰ نئا تُوغا وار اِ شك شا ذبي لواعذ ن اُربي اُم اِ جن نَبلا اِ ايمان، ماشا اِ محض ذبي اِ ايمان نس، اِ وُشا اُغولي اِ اُربي. ²¹ تُوغا اِ سن نيشان بلي مين زابس تُوغا اِ واعذ نئا، اِ زمار اُذٲ اِ كُ ثانيا. ²² خ وُيني عاوذ اِ ايمان

”اِ تواحسب اُس-د ذ ثاسكُذٲا“ . اُمز. 6:15

²³ ماشا وار تُوري ذبي سببٲ نس واهٲا ”اِ تواحسب اُس-د ذ ثاسكُذٲا“، ²⁴ ماشا عاوذ ذبي سببٲ نغ، اِني ذ اسن-بٲد اِ غا اِ تواحسب، اِني يُومن ذك وني د اِ سنكارن سببٲنغ زك اِ مئبٲن، ²⁵ وني اِ تواسلمن ذبي سببٲ ن ذنُوب نغ وُشا اِ تواسنكار-د جيما اُذ انغ اِ سكُذٲ.

ثايرِي ن اَرِّي س لمسيح ذك وُلاون نغ

5 ¹خني نشين، ام نتواسكذ س لايمان، اقا غارنغ لهنا اك-ذ اَرِّي زي سيذيئغ يشو لمسيح، ²وني زائس عاوذ اذول انغ-د اذاف س لايمان غار نيعم-ا مينذي نبد وُشا نسَمغار ذك وُسيشم ن وُغوئي ن اَرِّي. ³وار اِلي خ مان ايا واه، ماشا نسَمغار عاوذ ذي لحصارث، نسَن بلي لحصارث ثنالود-صبار، ⁴ذ صبار بيوض-د ناقلبث وُشا ناقلبث اذ تاوي اسيشم. ⁵اسيشم وار اتسحشيم شا، مينزي ثايري ن اَرِّي اقا نتوافارغ ذك وُلاون نغ س اروح اقدسن اذ انغ اموشن. ⁶ام ثوغا-نغ عاذ نضعف، ثوغا اموث لمسيح ذي طوع ن لكوفار ذي لوقت ني اذ اس ائاوكن. ⁷اتاغ اذ امث حد ذي طوع ن وُمسكاذ، مينزي ذي طوع ن وُصبحان اتاغ ازمار اذ ازعم حد اذ امث. ⁸ماشا اَرِّي املا انغ ثايري نس، مينزي وُمي ثوغا-نغ عاذ ذ امدناب، اموث لمسيح ذي طوع نغ. ⁹مشحال قاع لحو اغا نتواسكذ س اذامن نس وُشا اذ زائس نتواسنجم زي لغاضاب. ¹⁰مينزي لامبي ثوغا-نغ عاذ ذ لعديان، نتواسصلح اك-ذ اَرِّي س لموث ن ميس، مشحال قاع لحو، اوارني لامبي نونا اصلاح، اذ نتواسنجم س ثوذارت نس. ¹¹وار اِلي مان ايا واه، ماشا اذ نسَمغار ذي اَرِّي عاوذ س سيذيئغ يشو لمسيح وني ا زي نكسي اصلاح لحو.

اَدام ذ لمسيح

¹²خ وُيني، اُخوي س اِح ن بناذم يوذف-د دانب غار دُونيث وُشا س دانب ثوذف-د لموث، اموذ ذ ثوذف لموث غار اوذان مارا، ام خضان مارا. ¹³مينزي قبل ما ثوغا ثلا تاوراث، ثوغا دانب ذي دُونيث، ماشا دانب وار ائاوحسيب شا لامبي وار زين ثلي تاوراث. ¹⁴ماشا لموث ثوغا ثحكَم زي اَدام ال موسي وُلا خ يني وار اخضين ام اَدام، وني ذ صيفت ن وني اذ غا ياسن. ¹⁵ماشا وار اِلي س وُخطو امشناو س مين اموشن زي نيعم. مينزي مالا موثن اطاس خ سبيث ن اِح ن وُخطو، مشحال قاع اغا ثفيض نيعم ن اَرِّي ذ ثموشي س نيعم اواطاس، اقات ذ نيعم ا االن س اِح ن بناذم، يشو لمسيح. ¹⁶ماشا س ثموشي وار ايتيلي امشناو س اِح ن بناذم وني اخضان. س مينزي لحوكم اتاوي-د لحيساب زك اِح ن وُخطو، ماشا ثاموشي ن نيعم ثاوي-د زك واطاس ن وُخطو ال اغا نتواسكذ. ¹⁷مينزي مالا س وُخطو ن اِح اقا ثحكَم لموث خ سبيث ن وُخطو ن اِح ني، مشحال قاع ا غا حكمن ذي ثوذارت ايني اِكسين افيض ن نيعم ذ ثموشي ن تسكذا س ييجن،

أَقَاتْ ذِ يَشُو لَمَسِيح. ¹⁸أَم مَامَش سِ إِجْ نِ وُخَطُو أَقَا إِذُول لِحُوكَم خِ مَارَا إِوْذَان أَلْ لِحِيسَاب، أُمُو عَاوْذِ سِ إِشْتِ نِ لِحُدْمَتِ نِ تُسْكُذَا ثِنَاسِ-دِ نِيعْمَتِ غَارِ مَارَا إِوْذَان، جِيْمَا أَدْ تُوَسْكَذَنْ إِثُوذَارْتِ. ¹⁹مِيْنِزِي أَم مَامَشِ سِ وُخَطُو نِ إِجْ نِ بِنَادِمِ ذَوْلَنْ أَطَاسِ ذِ إِمْدَنَاب، أُمُو عَاوْذِ سِ طَاعَتِ نِ إِجْنِ ذَوْلَنْ أَطَاسِ ذِ إِمْسْكَاذَنْ. ²⁰مَاشَا سَنَجِ إِ مَانِ أَيَا تُوسِي-دِ تَاوْرَاتِ، جِيْمَا أَدْ إِمَارِنِي وُخَطُو. مَاشَا مَانِي إِمَارِنِي دَانِبِ، ثَمَارِنِي نِيعْمَتِ كَثَارِ سِ وَاطَاسِ، ²¹جِيْمَا، أَم مَامَشِ إِحْكَمِ دَانِبِ أَلْ لَمُوْتِ، أَدْ تُحْكَمِ نِيعْمَتِ ثَانِيَا سِ تُسْكُذَا أَلْ تُوْذَارْتِ نِ لَبْدَا سِ يَشُو لَمَسِيحِ سِيْدِيْتِنَغِ.

أَسْغُصَاصِ ذِي لَمَسِيحِ

6 مِيْنِ إِ غَا نِيْنِي خَنِي؟ مَا أَدْ نَقِيْمِ ذِي دَانِبِ جِيْمَا أَدْ ثَمَارِنِي نِيعْمَتِ؟ ²عَمَارِصِ، نَشِيْنِ إِني إِمُوْتَنْ إِ دَانِبِ، مَامَشِ عَاذِ ذَايَسِ إِ غَا نَدَارِ؟ ³مَا وَارِ تُسَيْمِ شَا بَلِي نَشِيْنِ مَارَا إِنِّي إِتَوَسَّغُصُنِ ذِي يَشُو لَمَسِيحِ، نَتَوَسَّغُصُنِ ذِي لَمُوْتِ نَسْ؟ ⁴أَقَا نَتَوَأْنُضِلِ أَكِيْسِ سِ وُسْغُصَاصِ ذِي لَمُوْتِ، جِيْمَا أَم مَامَشِ ذِ إِتَوَسْكَارِ لَمَسِيحِ جَارِ إِمْتِيْنِ غَارِ وُغُولِي نِ ثَبَابَاتِ، أُمُو إِ غَا نُويُورِ خَنِي ذِي تُجْذِيذْتِ نِ تُوْذَارْتِ. ⁵مِيْنِزِي مَالَا تُوْغَا نَذُولِ ذِ إِجْنِ أَكِيْسِ سِ وَارُوَسِ نِ لَمُوْتِ نَسْ أُمُو إِ غَا نَذُولِ عَاوْذِ ذِ إِجْنِ أَكِيْسِ سِ وَارُوَسِ نِ تُنُوكْرَا نَسْ. ⁶أَقَا نَسَنْ بَلِي بِنَادِمِ نَغِ أَقْدِيْمِ إِتَوَاصَلَبِ أَكِيْسِ، جِيْمَا أَدْ تُبْضَلِ أَرِيْمَتِ نِ دَانِبِ، وَارِ نَذِيكُوِيْلِ عَاذِ ذِ إِسْمَغَانِ نِ دَنْوْبِ. ⁷مِيْنِزِي وَنِي إِمُوْتَنْ، أَقَا إِتَوَاْفَكْ زِي دَنْوْبِ. ⁸مَالَا تُوْغَا نَمُوْتِ أَكْ-ذِ لَمَسِيحِ، أَقَا نُومَنْ بَلِي أَدْ نَدَارِ عَاوْذِ أَكِيْسِ، ⁹مِيْنِزِي نَسَنْ بَلِي لَمَسِيحِ، أَوَارِنِي لَامِي دِ إِتَوَسْكَارِ جَارِ إِمْتِيْنِ، وَارِ إِكُورِ أَدْ إِمْتِ عَاوْذِ. أَقَا لَمُوْتِ وَارِ خَاسِ تُحْكَمِ عَاذِ. ¹⁰مِيْنِزِي زَكْ وُغَزْدِيْسِ نِ لَمُوْتِ إِ إِمُوْتِ، أَقَا إِمُوْتِ إِ دَنْوْبِ إِجْ نِ وُغُورِ لَبْدَا، مَاشَا زَكْ وُغَزْدِيْسِ نِ تُوْذَارْتِ إِ إِدَارِ، إِدَارَاتِ إِ أَرَبِي. ¹¹أُمُو كَنِيُو عَاوْذِ: حَسِبِمْ إِخْفِ نَوْمِ ذِ إِمْتِيْنِ إِ دَانِبِ، مَاشَا ذِ إِمْدَارَنْ إِ أَرَبِي ذِي لَمَسِيحِ يَشُو سِيْدِيْتِنَغِ. ¹²خَنِي وَارِ ثَجِيْمِ دَانِبِ أَدْ إِحْكَمِ ذِي أَرِيْمَتِ نَوْمِ إِفْتَانِ، أَدْ أَسِ نِطَاعِمِ ذِي تَشَوَاتِ نَسْ، ¹³وُشَا وَارِ تَوَشِيْمِ إِغَزْدِيْسِ نِ أَرِيْمَتِ نَوْمِ أَمْ دُوْزَانِ إِ مِيْنِ وَارِ إِسْكَذَنْ، مَاشَا وُشَمِ إِخْفِ نَوْمِ إِ أَرَبِي أَمْ إِنِّي إِذُولَنْ غَارِ تُوْذَارْتِ زَكْ إِمْتِيْنِ وُشَا وُشَمِ إِغَزْدِيْسِ نِ أَرِيْمَتِ نَوْمِ إِ أَرَبِي أَمْ دُوْزَانِ إِ تُسْكُذَا. ¹⁴مِيْنِزِي دَانِبِ وَارِ خَاوَمِ إِحْكَمِ شَا، مِيْنِزِي وَارِ ثَلِيْمِ سَاذُو تَاوْرَاتِ مَاشَا سَاذُو نِيعْمَتِ.

إِسْمَعَان ن تْسَكْدَا

¹⁵ مامش ختني؟ ما اذ نخضا مينزي وار نلي شا ساذو تاوراث، ماشا ساذو نيعمت؟
 عمّارص! ¹⁶ ما وار تسيتم شا بلي وتي ومي توشيم اخف نوم ذ اسمعان اطاعت، اقا
 كنيو ذ اسمعان وتي ومي تطاعم، ما اذانب ال لموث نيغ اطاعت ال تسكردا. ¹⁷ تقاذ
 اس اربي، ثوغا كنيو ذ اسمعان اذانب ماشا ثذولم تطاعم س ول اذاب ن وسلمذ
 ومي تواسلمذم زيس، ¹⁸ وشنا لامبي توافكم زي دانب ثذولم ذ اسمعان ن تسكردا.
¹⁹ ساوالغ ام بناذم خ سبيت ن توضعف ن ويسوم نوم. مينزي ام مامش توشيم اغزديسن
 نوم ذ اسمعان الخمج و امين الان ضيد ن تاوارث ال اغا تضادم تاوراث، امي لخو
 وشم اغزديسن نوم ذ اسمعان ا تسكردا ال اغا توافقم. ²⁰ مينزي لامبي ثوغا كنيو ذ
 اسمعان ن دانب، ثوغا كنيو ذ اخورين زي تسكردا. ²¹ مان رغيلت اغا غاروم لخذني
 زي تمسلاين تني ا زي تنصضحام لخو؟ س مينزي انگار ننت ذ لموث. ²² ماشا
 لخو، ومي توافكم زي دانب ثذولم ذ اسمعان اربي، اقا لغيلت اغاروم اغا بيلين
 ذ ثوقديسي و ختني غار ونگار ذ ثوذارت ن لبدا. ²³ مينزي لخلص ن دانب ذ لموث،
 ماشا تاموشي ن نيعمت ن اربي ذ ثوذارت ا لبدا س لمسيح يشو سيديشغ.

امتيل ن لملاش

7 ¹ ما وار تسيتم شا، ا اوماتن، ساوالغ اك-ذ يني استن تاوراث، اقا تاوارث تخلص
 خ بناذم مين غايك اذار؟ ² مينزي تامغارث تني ساذو ورياز س تاوراث، اقا تغيما
 ثوير ذك بير ن ورياز نس مينترا عاذ اذار، ماشا مالا اموث ورياز، اقا-ت توافك زك
 ورياز س تاوراث. ³ ختني مالا ثذول ا ورياز نضني، مين غايك ورياز اذار، تواسما
 ثرنا. ماشا مالا اموث ورياز نس، نتات غارس لخوريبا زي تاوارث الامي وار ثرتي مالا
 تملش اك-ذ ورياز نضني. ⁴ ختني، ا اوماتن، كنيو عاوذ اقا ثموثم ا تاوراث س اريمت ن
 لمسيح، جيما اذ ثذولم ا ونضني ا وتي د اتواسنكارن جار امتينن، جيما اذ نوش لغيلت
 اربي. ⁵ مينزي ومي ذ انغ ثوغا ذك ويسوم، ثوغا شهوات ن ذئوب خدمت ذك
 اغزديسن ن اريمت نغ س تاوارث الامي اغا اوينت لغيلت ا لموث. ⁶ ماشا لخو اقا
 نتوافك زي تاوراث، اقا نموث خ مين ثوغا ذي نتواحس، جيما اذ نعبذ س تجذيدت
 ن اروح، وار اربي س ثقديمت ن لحارف ن تاوراث.

أَمْنَعِي أَكْ-ذِ ذُنُوبِ

⁷مين إِ غا نيني خنِّي؟ ما تاؤراث ذِ دَانب؟ عمَارص! ماشا وار سِينغ دَانب مُغِير س تاؤراث واهَا. عاوذ أَقَا وار سِينغ نَشُوت مالا وار ثَقَار تاؤراث ”وار تاسم!“⁸ ماشا دَانب يُوفا لَفُورِصا س ثوصِيَّت وُشا نَكْمَا ذايي كُول نَشُوت، مينِزِي نَبْلا تاؤراث دَانب إِمُوث.⁹ رِيش تُوعا دَارِغ نَبْلا تاؤراث، ماشا وُمي ذِ تُوسا ثوصِيَّت، إِنْذَا دَانب أَذِ اِدَارِ وُشا مُوثِغ.¹⁰ وُشا وُفِيغ بَلِي ثاوصِيَّت نِنِّي اِ ثُوذَارث، أَقَات- اِ لَمُوث.¹¹ مينِزِي دَانب، اُمُّ يُوفا لَفُورِصا س ثوصِيَّت، إِشْمَث أَيِي وُشا اِنِعا أَيِي زَايس.¹² خنِّي تاؤراث اِقْدَسَن ذِ ثوصِيَّت اِقْدَسَن، تُسَكِّذْ وُ ثَصْبِح.

¹³ما اِذُول أَيِي مِين اِلَان ذِ اَصْبِحان ذِ لَمُوث؟ عمَارص! ماشا دَانب، حِيما اَذِ اِبان دَانب، اِسَكْمَا ذايي لَمُوث س مِين اِلان ذِ اَصْبِحان، حِيما س ثوصِيَّت اَذِ اِذُول دَانب ذِ دَانب اَل اَنْكَار.¹⁴ اَقَا نَسَن بَلِي تاؤراث زِي اَرُوح اِ ثَلَا، ماشا نش ذِ اَيْسُوم مَنَزِغ سادُو دَانب،¹⁵ مينِزِي وار سِينغ مِين اِ غا كُغ وُمي وار تَكُغ مِين خَسِغ، ماشا مِين شَارِغ ذِ ماناوَوِي اِ تَكُغ.¹⁶ مالا تَكُغ مِين وار تَخَسِغ، اَذِ واقِغ أَكْ-ذِ تاؤراث، بَلِي اَقَا نَتَاث ثَصباح.¹⁷ لَحُونش وار تَكُغ مان أَيَا عاذ، ماشا دَانب اِ ذِ اِيبي اِزْدِغَن اِ تَكُغ اِث.¹⁸ مينِزِي سِنغ وار ذايي اِزْدِغ مِين اِشنان، ذِ مان أَيَا اِحْس اَذِ اِيبي ذِكْ وِيسُوم اِنُو، مينِزِي نَيْث أَقَات-ذايي، ماشا لَحْذايِم نِ ثُشُونِي، وار ثنْت وُفِيغ شا.¹⁹ مينِزِي وار تَكُغ لُخار اِ خَسِغ، ماشا لُغار اِ وار تَخَسِغ شا، ذِ ماناوَوِي اِ تَكُغ.²⁰ مالا تَكُغ مِين وار تَخَسِغ، وار اِلي عاذ ذِ نش اِ اِتَكَن مان أَيَا، ماشا دَانب وِنِّي ذِ اِيبي اِزْدِغَن.²¹ خنِّي تافِغ تاؤراث-اِ ذايي: خُجبي خَسِغ اَذِ كُغ لُخار، اَقَا ذايي لُغار.²² مينِزِي فارِغ س تاؤراث نِ اَرَبِي زِي جِيهت نِ داخِل نِ بِنادِم،²³ ماشا تَوَالِيغ ذِين تاؤراث نَضْنِي ذِكْ اِغْرُذِيَسَن نِ اَرِيْمَث اِنُو، ثَمْنِعا أَكْ-ذِ تاؤراث نِ لِعقل اِنُو وُشا ثُحْبِس أَيِي س تاؤراث نِ دَانب نِنِّي اِلان ذِكْ اِغْرُذِيَسَن نِ اَرِيْمَث اِنُو.²⁴ اِيحَاث مانا وِمشُوم-اِ نِ بِنادِم اِ لَبِغ! وِي ذِ اِيبي اِ غا اِسْتَجْمَن زِي اَرِيْمَث-اِ نِ لَمُوث؟²⁵ تَقَاذِيغ اَرَبِي س يِشُو لَمَسِيح سِيذِيثِنغ! اُمُو اَقَا نش سِيمانت اِنُو س لِعقل اِ خَدْمِغ اِ تاؤراث نِ اَرَبِي، ماشا س وِيسُوم اِ تاؤراث نِ دَانب.

ثُوذَارث س اَرُوح اِقْدَسَن

8 اِخْنِي وار ذِينِي بُو لِحِيساب لُخُوخ يِنِّي ذِي لَمَسِيح يِشُو، اِنِّي اِكُورن وار اِلي ذِكْ وِبرِيذ نِ وِيسُوم ماشا ذِكْ وِبرِيذ نِ اَرُوح.² مينِزِي تاؤراث نِ اَرُوح نِ ثُوذَارث ذِي لَمَسِيح يِشُو، اَقَا ثَفَلْ أَيِي زِي تاؤراث نِ دَانب ذِ لَمُوث.³ مينِزِي مِين

وار تَرمَار تاوراث ماغار تُوغا تَضَعف س وَيُسُوم، أَرَبِّي أَم ذِ اسَكِّ مَيِس ذَكِّ وَيُسُوم
 ياروسن ذِي دَانب وُشا مان أَيَا خ سَيِّبَت ن دَانب، أَقَا إِحاسب دَانب ذَكِّ وَيُسُوم،
 4 حِيما أَذِ إِتواكَمَل ذانِبغ لُومور إِسَكَّدَن ن تاوراث، ذَكِّ إِنِّي إِكُورن وار إِلِّي ذَكِّ
 وَبَرِيد ن وَيُسُوم ماشا ذَكِّ وَبَرِيد ن أَرُوح. 5 مِينزِي إِنِّي إِلان ن وَيُسُوم تَكَن نَيِّث
 نَسَن ذَكِّ وَيُسُوم، ماشا إِنِّي ن أَرُوح تَكَن ت ذِي أَرُوح. 6 مِينزِي نَيِّث ن وَيُسُوم ذ
 لَمُوث، ماشا نَيِّث ن أَرُوح ذ تُوذارت ذ لَهنا. 7 مِينزِي نَيِّث ن وَيُسُوم ذ لَعداوات إِ
 أَرَبِّي مِينزِي وار ثنكَّ شا أَرابي إِ تاوراث ن أَرَبِّي، وار د اس تَرمَار عاوذ. 8 إِنِّي ذَكِّ
 وَيُسُوم وار إِزمارن أَذِ أَرْضان أَرَبِّي. 9 ماشا كَنبو وار ثلِّم شا ذَكِّ وَيُسُوم، ماشا ذِي
 أَرُوح مالا إِزْدغ ذايوم أَرُوح ن أَرَبِّي. ماشا مالا حد وار غارس بُو أَرُوح ن لَمَسِيح،
 ذ وَنِّي وار إِتيلي نَس. 10 مالا تُوغا لَمَسِيح ذايوم، أَقَا أَرِيْمَت ثُمُوث زِي سَيِّبَت ن
 دَانب، ماشا أَرُوح أَقَات ذ تُوذارت زِي سَيِّبَت ن تُسَكَّدان. 11 مالا أَرُوح ن وَنِّي إِ ذ
 إِسَنكارن يَشو زَكِّ إِمَتِينن إِزْدغ ذايوم، أَقَا وَنِّي إِ د إِسَنكارن لَمَسِيح زَكِّ إِمَتِينن أَذِ
 إِسَدَّار عاوذ أَرِيْمَت نُم إِفنان س أَرُوح نَس إِ إِزْدغن ذايوم. 12 خَنِّي، أَوَمانن، نَشِين
 س وُمارواس، وار إِلِّي إِ وَيُسُوم حِيما أَذِ نَدَار خ لَحساب ن وَيُسُوم، 13 مِينزِي مالا
 نَدَّارم خ لَحساب ن وَيُسُوم، أَذِ ثَمَّم، ماشا مالا ثَنغِيم لَحذابيم ن أَرِيْمَت س أَرُوح،
 أَذِ نَدَّارم. 14 مِينزِي مارا إِنِّي إِتوانذهن س أَرُوح ن أَرَبِّي، نيشني ذِ أَث ن أَرَبِّي. 15 مِينزِي
 كَنبو وار ثكْسِيم شا أَرُوح ن تَسْمُوعِي وَنِّي كَنبو إِ عا يارن ذِ إِسَمعان حِيما أَذِ زابِس
 ثَكُودم عاوذ، ماشا أَقَا ثكْسِيم أَرُوح إِ زِي نَتواقيل ذِ أَراون، إِ زِي نَتلاغا 'أَبا'، مِين
 إِخس أَذِ يِنني 'بابا'، نِبغ 'ثاباباث'. 16 أَرُوح سِيمانت نَس إِشَهذ أَك-ذِ أَرُوح نَغ بَلِّي
 نَشِين ذِ ناروا ن أَرَبِّي. 17 مالا نَشِين ذِ ناروا، أَقَا-نغ عاوذ ذِ إِوريشن، إِوريشن ن أَرَبِّي ذِ
 إِوريشن أَك-ذِ لَمَسِيح، خَنِّي، مالا نَوْدَب أَكيس، أَذِ نَتواغُولِّي أَكيس عاوذ.

اعُولي إِ د غا ياسن

18 أَقَا حَسْبِغ أَوْدَب إِ خانغ إِتَكَن إِضا، وار إِسذيهلَّ شا أَذِ إِتواعبار س وُغُولِّي إِ
 د غا إِتواسَضْهان ذانِبغ. 19 مِينزِي مارا مِين دِ إِتواخلقن إِترجا اساركَاب ن أَث
 ن أَرَبِّي س مَزَرِي أَمقران. 20 مِينزِي مارا مِين دِ إِتواخلقن، أَقَا أَرَبِّي إِكَّ إِث ذِي
 لُوْهي، وار ثِ إِكِّي أَمَنِّي واها، ماشا إِكَّ إِث س لغاراض، 21 س وُسِيْم بَلِّي وُلا
 ذِ مارا مِين دِ إِتواخلقن سِيمانت نَس أَذِ إِتوافكَّ عاوذ زِي تَسْمُوعِي إِ لَعشَّ غار
 ثِيلَلِّي ن وُغُولِّي ن ناروا ن أَرَبِّي. 22 أَقَا نَسَن بَلِّي مارا مِين دِ إِتواخلقن إِزهار جوميع

س وُنزبارن ناروا آل إضا. ²³ وار اِلي مان ايا واهما، ماشا نشين سيمانن نغ، ايني غار ثلا ثمنوت ن اروح، نزهار عاوذ ذك اخف نغ، نترجا اذ نتواقبل ذ ميس، افكي ن اريمت نغ. ²⁴ مينزي اقا نتواسنجم ذك وُسيتم-ا. ماشا اسيتم ايتانن وار اِلي ذ اسيتم، مينزي مين ايتانن ا حد، مامش ا غا يگ اذ ذائس اسيتم عاذ؟ ²⁵ ماشا مالا نسيتم مين وار نتويلي، اقا نترجا ث س صبار. ²⁶ امني اذ اعاون اروح توضعف نغ، مينزي وار نسين شا مامش ذ انغ ا غا ايشوار اذ نزال، ماشا اروح سيمانن نس اشفع ذانغ س ازهارن وار انطقن. ²⁷ ذ وتي ايتقشن ذك ولاون اسن مين الان ذ نيث ن اروح، اقا تشفعا ذك امقداسن ام مامش ث اخس اري. ²⁸ نشين نسن بلي مارا ثيمسلايين خدمت اك-ذ وياويا ا لخار ا يني اتخسن اربي، ايني اتوالاغان علاحساب لغاراض نس. ²⁹ مينزي ايني ازار اسن اثن، اقا ازار اعلم اثن جيما اذ ايلن ذي صيفت ن ميس جيما اذ ييلي نتا ذ امنزو جار واطاسن و اوامثن. ³⁰ وُشا ايني ازار اعلم اثن اقا ذ ايني خ ذ الاغا ثانيا وُ ايني خ ذ الاغا اقا ذ ايني اسكد ثانيا وُ ايني اسكد اقا ذ ايني اسغولا ثانيا.

ثايري ن لمسيح

³¹ مين ا غا نيني خني ذي مان ايا؟ مالا اربي اكيذغ وي ذ انغ ا غا اضاذن؟ ³² وتي وار اشطارن شا خ ميس ماشا اوش اذ ذي طوع نغ مارا، مايبي وار ذ انغ ايتيش كوليشي اك-ذ ميس عاوذ؟ ³³ وي ا غا اكسين ثانفولت ا يني اتواخضارن زي اربي؟ اربي ذ وتي ايتسكانن. ³⁴ وي خانغ ا غا احكمن؟ لمسيح ذ وتي اموشن، عاذ حسن، نتا ذ وتي د اتواسنكارن، ذ وتي الان ثانيا خ وفوسي ن اربي وُلا نتا ذ وتي اشفعن ذانغ ثانيا. ³⁵ وي ذ انغ ا غا اوضان خ ثايري ن لمسيح؟ ما لخصارث نيغ ضيقاث نيغ امارث نيغ لاز نيغ ثوعارينت نيغ لخاطار نيغ سيف؟ ³⁶ ام مامش ثورا ”اقا خ سييت نك نتوانغ اس اكمل، نتواحسب امشناو احوليين ا نغارصت. ³⁷ ماشا ذي مان ايا مارا نذول كثار زك ايني اغلبن س وتي ذ انغ اخسن. ³⁸ اقا نش نتواسقنع بلي نيغ لموث نيغ ثوذارث نيغ لمالاكات نيغ لحوكام نيغ صولاتاث نيغ مين ن بيضا نيغ مين ا د غا ياسن ³⁹ نيغ لوعلا نيغ رالاغ نيغ وُلا ذ ايشث ن لحاجث نضني زي مين د اتواخلقن ثومار اذ انغ ثبضا خ ثايري ن اربي ثني ذي لمسيح يشو سيذرينغ.

أَرَبِّي ذ وَبْدُوذ نَس إِسْرَائِيل

9 أِقَارَغ بِيذت ذِي لَمَسِيح، وار سَخَارِيَقَع شَا وُشَا تَانْفَسَشْت اِنُو تَشَهَّد عَاوِذ س اَرُوَح اِقَدَّسَن، ²بَلِّي غَارِي اَشْضَان اِمِغَار ذ لَحْرِيق وار اِتْبَدِّي ذَكُّ وُل اِنُو. ³اَقَا ثُوغَا سَيِّشِيَمِغ، مَاعَلِيك وُفِيَع سِيَمَانت اِنُو تَوَانَعْلَغ زِي لَمَسِيح ذِي طَوَع ن تَارَوَان ثُمُورث اِنُو عِلَاَحْسَاب اَيُّسُوم. ⁴بِيشِي ذ اِسْرَائِيلِيَن، تَوَاقِبَلَن ذ مَيِّس، غَارَسَن وُغُولِّي ذ لُغُوهُوُذ ذ تَاوَرَاث ذ لُحْدَمْت ن وُعْبَاد ذِي تَاوَرَاث اِقَدَّسَن ذ لُغُوهُوُذ، ⁵غَارَسَن لَجْدُوذ وُشَا زَايَسَن لَمَسِيح خ وَبْرِيذَن وَبِيْسُوم وَتِي ذ اَرَبِّي سَنَج مَارَا مِيَن اِلَان، اَقَا نَتَا اِتْوَابَارِك اِلْبَدَا قَاع، اَمِيَن.

⁶مَاشَا وار اِلِّي اَمُو اَلْمُي وُلا ذ اَوَال ن اَرَبِّي وار بِيوِيض، مِيَنزِي مَارَا اِنِّي زِي اِسْرَائِيل وار لِيَن شَا ذ اِسْرَائِيلِيَن ⁷وُلا ذ مَارَا بِيشِي وار لِيَن شَا ذ تَارَوَان اِبْرَاهِيَم، مِيَنزِي بِيشِي ذ زَارِيَعَت ن اِبْرَاهِيَم، مَاشَا اَذَلِيَس اِقَار ”ذِي اِسْحَاق اَذ اَش لاغان زَارِيَعَت“. ⁸خَنِّي مَاشِي تَارَوَان وَبِيْسُوم اِلَان ذ تَارَوَان اَرَبِّي، مَاشَا تَارَوَان لُغُوهُوُذ اَذ تَوَاحْسِنَن ذ زَارِيَعَت. ⁹مِيَنزِي اَوَال ن لَوَاعِذ ذ وا ”غَار لُوَقْت-ا اَذ د اَسِغ وُشَا اَذ غَارَس بِيَلِي غَار سَارَا مَيِّس“. ¹⁰وار ثَلِّي تَانِيْشَا وَاها، مَاشَا وُلا ذ رِيْفَقَا ثَكْسِي س دَيِّسْت زَكُّ اِحْن، نَتَا ذ اِسْحَاق جَدِّيَنغ. ¹¹مِيَنزِي وُمِي عَاذ وار ذ اِخْلِيَق حُد، وار كَمِيَن عَاذ لُخَار وُلا ذ لُغَار، حِيْمَا اَذ اَقِيَم لُغَارِض ن اَرَبِّي اَم ث اِحْضَار نَتَا، وار اِلِّي ذَكُّ وَبْرِيذَن لُخْدَايَم مَاشَا ذَكُّ وَبْرِيذَن وَتِي اِتْلَاغان، ¹²اَقَا اِتْوَانَا اس ”اَقَا اَمْقَرَان اَذ اِخْدَم خ وُمزِيَان“، ¹³اَم مَامَش ثُورا ”يَاعْقُوب اِحْسَع، مَاشَا شَارَهَغ اِسُو“.

¹⁴مِيَن اِغَا نِيْنِي خَنِّي؟ مَا اِقَدَّ اَذ بِيَلِي غَار اَرَبِّي مِيَن وار اِسْكَنْذَن؟ عَمَّارِص! ¹⁵مِيَنزِي نَتَا اِقَار اِمُوسَى ”اَذ اَرْحَمِغ وَي خَسِغ، اَذ اَرْحَمِغ وُشَا اَذ جِيَنغ خ وَي خَسِغ اَذ جِيَنغ“. ¹⁶خَنِّي تَامَسْلَاشْت وار تَقِيَم شَا غَار وَي اِتْخَسَن وُلا غَار وَي اِتْاَزَلَن، مَاشَا غَار اَرَبِّي وَتِي يَارْحَمَن. ¹⁷مِيَنزِي اَذَلِيَس اِقَار اِفِيرْعُون ”اَقَا اِمَان اَيَا سَنكَارِغ-د شَك، حِيْمَا اَذ زَايَك سَنَشِنغ جَهْد اِنُو وُشَا اَذ اِتْوَابَارِح اِسْم اِنُو ذِي مَارَا دُونِيْت“. ¹⁸خَنِّي نَتَا اَذ يَارْحَم وَي اِحْس وُشَا اَذ اِسْتَسْح وَي اِحْس.

¹⁹لُخُو اَذ اِبِي ثِيْنِيَم ”مَايْمِي اِتْشَشَا عَاذ، مِيَنزِي وَي اِغَا اِمَعَالَان اَك-ذ مِيَن اِحْس نَتَا؟“ ²⁰مَاشَا مِيَن ثَعْنِيذ شَك، اَبْنَادَم، وَتِي اِتْقَاشَا حِن اَرَبِّي؟ مَا مِيَن اِتْوَاكْن اِزْمَار اَذ اِنِّي اِوْتِي ث اِكْن ”مَايْمِي ذ اِبِي ثَكْنِيذ اَمُو؟“ ²¹مَا وار اِلِّي غَار بُو-تِلَاخْت صُولِطَا خ تِلَاخْت حِيْمَا اَذ اِكْت زَكُّ اِسْتَن ن لُعَجْنَت اِسْتَن ن لُقَشَعَت اِلْكَارَامَا وُ وَنْضَنِي اِ وُبَهْدَل؟ ²²مَا خَنِّي، مَالَا اَرَبِّي - اَم ثُوغَا اِحْس اَذ اِسْتَن لُغَاضَاب نَس وُلا اَذ اِسْبِيَن جَهْد

نَس - أَقَا يَارْبُو س واطَّاس ن تَابِيع ن لِحَاضَار لِقَشُوع ن لِعَاضَاب إِنِّي إِتَوَاسُوجِدُن إِ
 وَهَلِّك،²³ جِيْمَا خَنِّي أَذ إِسْبِيْن أَكْرَان وُوعُولِي نَس خ لِقَشُوع ن أَرْحَمْت إِنِّي إِزَار إِسُوجِد
 إِئِن إِ وُوعُولِي،²⁴ إِنِّي زَائِسِن نَلَا وُولا ذ نَشِيْن وُومي ذ انغ-د الإِغَا، إِنِّي وار إِلِيْن زَكْ وُذَابِن
 وَاها، مَاشَا عَاوِذ زِي لَكُنُوس. ²⁵أَمَشِنَاو مَامَّش إِقَار هُوَسِيَا عَاوِذ ”أَذ سَمَّيْغ إِ وِنِّي وار
 إِلِيْن ذ أَيْدُوذ إِئُو ”أَيْدُوذ إِئُو، وُشَا إِ وِنِّي وار إِلِيْن ذ أَمَعِيْزَ ذ ”أَمَعِيْزَ“. ²⁶”أَذ بِيْلِي ذَكْ
 وَمَشَان مَانِي ذ اسن إِتَوَانَا ”وار نَتِيْم شَا ذ أَيْدُوذ إِئُو“، بَلِي ذَبْنِي أَذ اسن لاغان ”نَارَوَان
 أَرَبِّي إِدَارِن“. ²⁷إِشَاعِيَا إِتَلَاغَا زِي جِيْهَت ن إِسْرَائِيْل ”مَالَا تُوْغَا لَقَد ن نَارَوَان ن إِسْرَائِيْل
 أَمَشِنَاو إِجْذِي ن لِحَار، أَقَا مِيْن إِ غَا إِقِيْمِن أَذ إِنْجَم، ²⁸مِيْنَزِي نَتَا أَذ إِكْمَل مَامْسَلَاشْت
 وُشَا أَذ إِقْضِعْ أَوَال س نَسْكَذَا، مِيْنَزِي أَرَبِّي أَذ إِكْ أَوَال إِقْضِعْن خ ثَمُورْت ذَغِيَا.“²⁹”أَم
 مَامَّش إِزَار إِشَاعِيَا إِنَا ”مَاعَلِيْكَ أَرَبِّي ن سَابَاغُوث (=لِعَسْكَار ن وُجِنَا) وار ذ انغ إِجْجِي
 زَارِيْعْت، أَذ نَدُول أَمَشِنَاو شُوْدُوْم وُشَا أَذ نَارُوْس ذِي كَامُورَا.“

نَبَلَا لِإِيْمَان ن إِسْرَائِيْل

³⁰مِيْن إِ غَا نِيْنِي خَنِّي؟ لَكُنُوس إِنِّي وار يَارزُون نَاسْكَذَا، أَقَا كَسْبِيْن نَاسْكَذَا، مَاشَا
 نَاسْكَذَا نَتِّي س لِإِيْمَان. ³¹مَاشَا إِسْرَائِيْل أَم تُوْغَا إِضْفَار تَاوْرَات ن نَسْكَذَا، وار بِيُوِيْض
 شَا غَار تَاوْرَات ن نَسْكَذَا. ³²مَامِيْ؟ مِيْنَزِي نِيْشِي أَرزُون أَيْنِي، وار إِلِي شَا زِي لِإِيْمَان
 مَاشَا زِي لِخَذَابِن ن تَاوْرَات، مِيْنَزِي نِيْشِي نَذْرَفِن ذَكْ وُزْرُو ن وُنْقِرَاض. ³³”أَم مَامَّش نُورَا
 ”أَقَا أَذ كَغْ ذِي سِيْيُون أَرزُون ن وُنْقِرَاض ذ نَاضْضَارْت ن لَفْضِيْحَت وُ مَارَا وَي زَائِس إِ
 غَا يَامِن، وار إِتْضَحْجِي شَا.“

10 أَوَمَانِن، لَفْرَاْحْت ن وُل إِئُو وُشَا نَاذَالِيْث نَتِّي زُوْلُغْ غَار أَرَبِّي خ سَبِيْث ن
 إِسْرَائِيْل، أَقَات إِ وُسْجَم. ¹أَقَا شَهْدَغْ خَاسِن أَقَا نِيْشِي غَارَسِن شَضْبَارْت إِ أَرَبِّي،
 مَاشَا وار إِلِي خ لِحَسَاب ن ثَمُوسِنَا إِكْمَلِن. ²مِيْنَزِي أَم تُوْغَا وار سِيْنِن نَاسْكَذَا ن أَرَبِّي،
 أَرزُون أَذ كُن نَاسْكَذَا ن إِخْف نَسِن، وار تَوَاضَعِن شَا إِ نَسْكَذَا ن أَرَبِّي. ³مِيْنَزِي أَنْكَار ن
 تَاوْرَات نَتَا ذ لِمَسِيْح، أَقَات ذ نَاسْكَذَا إِ كُول إِجِن وِنِّي يُوْمِنِن. ⁴مِيْنَزِي مُوسَى يُوْرَا زِي
 جِيْهَت ن نَسْكَذَا نَتِّي زِي تَاوْرَات وُشَا إِقَار ”بِنَادِم وِنِّي إِ ذ إِتَكَّن مَان أَيَا، أَذ إِدَار زَائِس.“
⁵مَاشَا نَاسْكَذَا نَتِّي زِي لِإِيْمَان نَقَّار أَمُو ”وار نَقَّار ذَكْ وُل نَكْ وَي إِ غَا إِكْأَعْدِن غَار
 وُجِنَا؟“ جِيْمَا أَذ د إِسْهَوَا لِمَسِيْح، ”نِيْغ ”وي إِ غَا إِهَوَان ذَكْ وَحْفُور؟“ جِيْمَا أَذ إِسْكَأَعْد
 لِمَسِيْح زَكْ إِمْتِيْن. ⁶مَاشَا مِيْن إِ غَا نِيْنِي نَسْكَذَا؟ ”أَوَال يُوْدَس إِ شَك، أَقَات ذَكْ

وَقُمُوم نَكْ وُلَا ذَكْ وُل نَكْ“. واذ أوال ن لإيمان إزي نَبَارِح. 9 مالا تشهذد س وَقُمُوم نَك بلي يشو ذ سيذدي وُشا اذ ثامند س وُل نَك بلي آرَبِي اِسْتَنكَار اِث زَكْ اِمْتِينِن، اذ تَواَسَنجَمذ. 10 مِينِزِي س وُل إ زِي اِتاَمِن اَل ناسكُندا وُشا س وَقُمُوم اِشَهْد زَايس اِ وُسُنَجَم. 11 مِينِزِي اَذَلِيس اِقَار ”مارا وِي زَايس اِ غا يامنِن، وار اِتْصَحْجِي شا. 12 مِينِزِي وار ذِين بُو لَفارَز جَار وُذاي ذ وُيُونانِي، مِينِزِي سِيذِي ذ اِجِن اِ مارا، اَقَا غارس اَطاس ن واكْرا اِ مارا اِنِّي خاس-د اِتلاغان. 13 مِينِزِي ”كُول اِجِن وِنِي اِ غا اِلاغان س ييسم ن سِيذِي اذ اِنجَم. 14 مامش خاس اِ غا اِلاغان خ وِنِي اِ ذِي وار وُمينِن شا؟ مامش اِ غا يامنِن ذَكْ وِنِي وُمي وار سَلِين وُشا مامش اِ غا سَلِن مالا وُلا ذ اِج وار زَايس اِبارِح شا؟ 15 مامش اِ غا بارِحِن مالا وار ذ تَواَسَكْن؟ اَم مامش تُورا ”مَشحال ضارِفِن اِضارِن ن يِنِي اِتْبارِحِن س لَخْبار اَصْبَحان ن لَهنا، اِنِّي اِتْبارِحِن تِيمَسلايِن تِيبْصَحانِين.“

16 حَنِّي ماشِي مارا طاعِن اِ لَخْبار اَصْبَحان، مِينِزِي اِشاعِيَا اِقَار ”أ سِيذِي، وِي اِ غا يامنِن زِي ثِبرات نَع؟“ 17 اَقَا لإيمان زَكْ وُسَحْسِي وُشا اُسَحْسِي زَكْ واول ن آرَبِي. 18 ماشا اذ اِنْبِع ”ما زَعْمًا نِيشِي وار سَلِين؟“ واه، سَلِين ”لَحسَّ نَسِن اِنْبِع-د غار مارا تِيمورا وُلا ذ اِوالن نَسِن غار اِنكُورا ن دُونِث.“

19 ماشا اذ اِنْبِع ”ما اِسرايِيل وار ثَفهيم شا مان اَيَا؟“ غار وُمزوار مُوسى اِنَّا ”اذ ذايوم كَغ تُوسُجِي زَكْ يِنِي وار اِلِن شا ذ لَكُنس وُشا س اِج ن لَكُنس اَفْعُول اذ ذايوم كَغ اَحْيَق.“ 20 حَنِّي اِشاعِيَا اِرْزَعَم اذ اِنِي ”اَقَا وُفِين اَبِي، اِنِّي وار خافي يارزُون، اَقَا ذَوْلغ بانغ-د اِ يِنِي وار خافي اِسْتَقْسِين.“ 21 ماشا زِي جَبِهت ن اِسرايِيل اِقَار ”اَس اِكْمَل سَوِيذِغ اِفاَسِن اِنُو اِ وِيذوذ اِعْصان اِغْتِن.“

لَباقِيَّت ن اِسرايِيل

11 اذ اِنْبِع ”ما يوكِّي آرَبِي اَيُذوذ نَس؟“ بالاك، اَقَا نش سِيمانت اِنُو عاوذ ذ اِسرايِيلِي زِي زارِيعت ن اِبراهيم، زِي تَقبِيلت ن بِنِيامين. 2 آرَبِي وار اِنطَار شا اَيُذوذ نَس اِ تُوغا اِسِن قِبَل. نِبِع وار تَسِينم شا مِين اِقَار وُذَلِيس خ اِلِيَا، اَم مامش تُوغا اِكْسِي تانفُولت خ اِسرايِيل غار آرَبِي وُشا اِقَار 3 ”أ سِيذِي، نَغِين اِمكاشافِن نَك، اِرْدَلَن اَعالطار. قِيمغ نش واهَا وُشا نِيشِي اِرزُون لَعمار اِنُو.“ 4 ماشا مِين ذ خاس يارا آرَبِي؟ ”اَقَا جَبِغ اِ يِخِف اِنُو سَبع الاف ن يِرِيازِن وار ضَرِين شا غار اِضارِن ن باعال.“ 5 اَمُو ذِي لوقْت ن يِضا عاوذ، اَقَا تَقِيم اِشْت ن لَباقِيَّت اَم ت اِخْضار نَتّا خ لَحْساب ن

نَبِعْمَث. ⁶ مالا نَلَّا س نَبِعْمَث، أَقَا وار ثَبِيلِي عاذ س لَخْدَايِم نَبِغ خَنِّي نَبِعْمَث وار ثَلِّي عاذ ذ نَبِعْمَث. ماشا مالا س لَخْدَايِم، وار ثَلِّي عاذ ذ نَبِعْمَث. مالا لَّا، أَقَا لَخْدَمَث وار ثَلِّي عاذ ذ لَخْدَمَث. ⁷ مِين إِغَا نَبِينِي خَنِّي؟ مِين تُوَعَا ثَارُورُ إِسْرَائِيل وار ث ثَطِيف، ماشا إِنِّي إِتَوَاحْضَارِن طَفْنِث وُشَا إِنْضَبِي إِنِّي إَقِيمِن، ذَوْلَن قَسْحِن. ⁸ أَم مَامَش ثُورَا ”أَقَا أَرَبِّي إِوَشُ أَسْنِ أَرُوح ن بِيضْص ذ نَبِطَاوِين إِ وار إِتَوِيلِين، ذ إِمْرُوعِن إِ وار إِتْسَلِين أَل أَسْن ن بِيضَا.“ ⁹ دَاوُد إِقَار ”أَذ ثَذُول نَارُوضَا ن تَبِغَارْصِين نَسْن ذ تَاخْشَفْث ذ تَاْفُضُولْت ذ تَعْنَكْرِيفْث ذ وُخْلَصْ أَعْفَان إِ نَبِثِينِي ¹⁰ وُشَا أَذ ذَارْغَلْنْت نَبِطَاوِين نَسْن جِيْمَا وار تَوِيلِين وُشَا أَذ إِقُوس وَعُرُور نَسْن إِ لَبْدَا.“

لَفْرُوعِ الْقَمْنِ

¹¹ عَاوُذُ أَذ إِبِغ ”مَا نَذْرَفِن جِيْمَا أَذ وُضَان؟“ عَمَارْص! ماشا س وُوطُو نَسْن بِيوض-ذ وُسْنَجْم إِ لَكْنُوس، جِيْمَا أَذ ذَائِسِن إِكْثُ تُوسْمِي. ¹² مالا إِذُول وُوطُو نَسْن ذ أَكْرَا ذ أَمْقِرَان إِ ذُوْنِث وُشَا تَاخْصَارْت نَسْن ذ أَكْرَا إِ لَكْنُوس، مَشْحَال قَاع إِغَا ثَبِيلِي لَكَمَالْت نَسْن كَنَار. ¹³ أَقَا سَاوَالِغ أَكِيدُوم، أ لَكْنُوس، وُمِي لَبِغ ذ أَمَارَان إِ لَكْنُوس وُشَا سَمْعَارِغ ذِي لَخْدَمَث ن تَسْخَارْت إِنُو، ¹⁴ أَتَاغُ أَذ بَبِيلِي كَبِغ تُوسْمِي ذَكْ وَيْدُودُ إِنُو (=وَيْسُومُ إِنُو) وُشَا أَذ تَوَاسْتَجْمِن شَا زَائِسِن. ¹⁵ س مَبِزِي، مالا أَمَنْضَار نَسْن أَقَا-ث ذ أَصْلَاح ن ذُوْنِث، مَامَش إِغَا بَبِيلِي وَقِبَال نَسْن مَبِغَر تُوذَارْت زَكْ إِمْتِين؟ ¹⁶ مالا تُوعَا ثَامْمَزُوث ن صَابْث تَقْدَس، أَمْنِي وُلا ذ لَعْبَنْث ن أَرَشِثِي تَقْدَس، مالا تُوعَا أَرْوَار إِقْدَس أَمْنِي وُلا ذ لَفْرُوع. ¹⁷ ماشا مالا تُوعَا إِتَوَاقَصْ شَا ن لَفْرُوع وُشَا، ذ أَرْمُورُ إِتَوَالْقَمْنِ ذَكْ وَمَشَان نَسْن، ثَذُولْذ تَسْنَفْعُذ زَكْ إِزُورَان ذ زَشْت ن تَرِثُوث، ¹⁸ وار تَنْفَخْ شَا خ لَفْرُوع. مالا تَنْفَخْذ، أَقَا شَكْ وار ثَارِبُودُ شَا أَرْوَار، ماشا أَرْوَار يَارْبُو شَك. ¹⁹ أَذ تَبِينِيذ ”أَقَا تَوَاقَصْ لَفْرُوع جِيْمَا نَشْ أَذ تَوَالْقَمِغ.“ ²⁰ مَلِيح! نَبِثِينِي تَوَاقَصْ وُمِي وار وُمِينِن شَا وُشَا شَك س إِيْمَان تَتَوَالْقَمْن. وار تَنْفَخْ شَا، ماشا كُود. ²¹ مَبِزِي مالا تُوعَا أَرَبِّي وار إِتَشْطَار شَا خ لَفْرُوع ن طَبِيعْث، أَتَاغُ وار خَاكُ إِتَشْطَار شَا عَاوُذ. ²² أَقَا ذَا ذ لَضْرَافْت ن أَرَبِّي ذ لُوعَارْث تَس: لُوعَارْث خ بَبِي إِوُضَان، ماشا لَضْرَافْت خَاكُ مالا تَطْفُذْ ذِي لَضْرَافْت نَبِغ وُلا ذ شَكُ أَذ تَتَوَاقَصْذ. ²³ وُلا ذ نَبِثِينِي، مالا وار قَبِمْن نَبَلَا إِيْمَان، أَذ تَوَالْقَمْنِ إِيحْ ن وُمُورْ نَضْبِينِي، مَبِزِي غَارِ أَرَبِّي ثَبِرْمَار جِيْمَا أَذ ثِن الْقَمْ عَاوُذ. ²⁴ مَبِزِي مالا شَكُ تَتَوَاقَصْذ زَكْ وُزْمُورْ وَنِي إِيْلَانِ ذِي لَخْلَا وُشَا شَكُ تَوَالْقَمْنِ ذِي تَرِثُوثِث تَنِي إِيْلَانِ ذِي لَعَكْس ن طَبِيعْث نَكْ، مَشْحَال إِهُونِن كَنَارُ أَذ تَوَالْقَمْنِ إِنِّي ذ لَفْرُوع س طَبِيعْث نَسْ ذِي تَرِثُوثِث نَسْن؟

أَسْنَجَم نِ إِسْرَائِيلَ

²⁵مِينِزِي وار تَخْسَع شَا، أَوَمَانْ، جِيْمَا وار ذِ ثِيلِيم ذِ إِمِيغِيْسِن أَك-ذِ يِيخَف نَوْم، أَذِ ثَقِيمَم وار فَهَمَم شَا سَيِّرَا: أَقَا ثَمَسَار لَقَسَاخْ خِ إِشْث نِ شِغَارْث نِ إِسْرَائِيلِ أَلِ إِ ذِ غَا يَادَفِ وَعَمَار نِ لَكْنُوسِ. ²⁶أَمُو إِ غَا ثَنَجَم مَارَا إِسْرَائِيلِ أَم مَامَشْ ثُورَا

”أَسْنَجَم أَذِ دِ إِفَغِ زِي سَيُونِ وَشَا أَذِ إِسْبَعْدَ لَفْجَاخْ خِ أَرَبِّي خِ يَاعْقُوبِ.

²⁷ذِ وَ ذِ لَعَاهَدِ زَائِي إِ نِيثِي خِ مِينِي إِ غَا مَجِيغِ دُّوْبِ نَسْنِ.“

²⁸زِي جِيهْث نِ لَخْبَارِ أَصْبَحَانِ وَآخَا نِيثِي ذِ لَعَذِيَانِ خِ سَيِيْثِ نَوْم، مَاشَا وَمِي تَوَاحْضَارِنِ زِي أَرَبِّي أَقَا نِيثِي ذِ إِمَعِيْزِنِ خِ سَيِيْثِ نِ لَجْدُوْذِ. ²⁹مِينِزِي ثِيْمُوْشَا ذِ ثَلَاغِيْثِ نِ أَرَبِّي أَقَا نَتَا وار خَاسَتِ إِتْنَدَمِّي شَا. ³⁰مِينِزِي أَم مَامَشْ ثُوْغَا كَنِيُو وار ثَطِيْعَمِ شَا أَرَبِّي، مَاشَا لَخُوْ أَقَا ثَكْسِيْمِ أَرْحَمْثِ سِ لُمُوْعْصِيِيْثِ نَسْنِ، ³¹أَمُو نِيثِي عَاوْذِ وار طِيْعِنِ شَا لَخُو، جِيْمَا نِيثِي عَاوْذِ أَذِ كَسِيْنِ أَرْحَمْثِ سِ أَرْحَمْثِ نَوْم. ³²مِينِزِي أَرَبِّي إِحْبَسِ إِثْنِ مَارَا سَادُوْ لُمُوْعْصِيِيْثِ، جِيْمَا أَذِ ثِنِ يَارْحَمِ مَارَا. ³³أَرَالَاغِ نِ وَآخْرَا ذِ ثِيغِيْثِ ذِ ثَمُوسِنَا نِ أَرَبِّي، مَامَشِ إِ غَا كَغْ أَذِ قَلْبِغِ لِحْكَامَاثِ نَسْ، مَامَشِ إِ غَا كَغْ أَذِ أَفَغِ إِثْرِيْدِنِ نَسْ.

³⁴”مِينِزِي وَيِ إِ غَا إِسْنِنِ نِيْثِ نِ سِيْذِي نِيغِ وَيِ ذِ اسِ إِالَانَ ذِ أَمَشَاوَارِ؟“

³⁵”نِيغِ وَيِ ذِ اسِ إِزَارِنِ إِوْشِ اسِ وَمِي ذِ اسِ إِتْخَصَا أَذِ إِتْوَاخْلَصَ زَائِسِ؟“

³⁶مِينِزِي زَائِسِ ذِ زِي غَارَسِ ذِ غَارَسِ كُولِشِي. غَارَسِ أَعُوْلِي إِ لِبْدَا قَاعِ. أَمِيْنِ.

ثِيغَارْصِيْنِ إِدَارِنِ

12 ¹إِتْتَارْغِ زَائِيَوْم، أَوَمَانْ، سِ أَرْحَمْثِ نِ أَرَبِّي، أَذِ ثَقْدَمِ أَرِيْمَاثِ نَوْمِ ذِ ثَاغَارْصِثِ إِدَارِنِ، إِقْدَسِنِ، يَارْضَانَ إِ أَرَبِّي، وَ ذِ أَعْبَادِ نَوْمِ إِشْوَارِنِ. ²وار ثَمَقُودَامِ أَك-ذِ زَمَانِ-أِ، مَاشَا بَدَلَمِ سِ وُلْقَمِ نِ لَعْقَلِ نَوْمِ زِي جَزِيْدِ جِيْمَا أَذِ ثَقْلَبَمِ مِيْنِ إِحْسِ أَرَبِّي: مِيْنِ إِشْنَانَ ذِ مِيْنِ يَارْضَانَ ذِ مِيْنِ إِكْمَلِنِ. ³أَقَا سِ نِيْعَمْثِ ثَنِي إِ ذِ ابِي إِمُوشِنِ، قَارْغِ إِ كُولِ إِجْنِ زَائِيَوْم، وار ثَخَارْصِ سَنَجِ إِ مِيْنِ إِتْلِيْقِ وَخَارْأَصِ نَسْ، مَاشَا خَارْصِ ذِي مِيْنِ إِتْلِيْقِنِ لَقْدِنِ لِإِيْمَانِ إِ ذِ اومِ إِوْشَا أَرَبِّي إِ كُولِ إِجْنِ زَائِيَوْم. ⁴أَم مَامَشْ

غارنغ أطاس ن إِعْزْدِيسِن ذَكْ إِشْت ن أَرِيْمْت وُشا مارًا إِعْزْدِيسِن ن أَرِيْمْت وار غارسن بُو لَخْدْمْت ذ إِشْتن، ⁵أَمُو نَشِين، وَاخَا نَشِين ذ اطاس، أَقا-نغ ذ إِشْت ن أَرِيْمْت ذِي لَمْسِيح ذ إِعْزْدِيسِن إِبْن إِ وَنْضِي. ⁶أَقَا غَارْنغ تِيْمُوشَا إِمْسَبْضَان عِلاَحْسَاب نِيْعْمْت تْنِي إِ ذ انغ إِمُوشِن: ما أَكاشاف عِلاَحْسَاب لِإِيْمَان، ⁷نِيغ وَي إِخْدَمِن ذِي تْسَحَارْت، نِيغ وَي إِسْلَمَازِن ذَكْ وُسْلَمَذ، ⁸نِيغ وَي إِعْلَمِن ذَكْ وُعْلَام، نِيغ وَي إِوشِين س تَشْرِيْمْت، نِيغ وَي إِتْضَبَارِن س وُمَحَاض، وُلا وَي يَارْحَمِن س لَفْرَاحْت.

ثايرِي جَار واوَمَاتِن

⁹أَذ تِيْلِي ثايرِي نَبْلا نِيْفَاق. شارهْم لُغار، تَشْبَارْم ذِي مِيْن إِشْنَان. ¹⁰إِيْم مِليح إِبْن أَك-ذ وَنْضِي س ثايرِي ن ثاوَمَات، إِزَارْم أَذ تَشْنَعْم إِبْن وَنْضِي، ¹¹وار تِيْلِيْم ذ إِفِينِيَانِن ذَكْ وُمَحَاض، إِيْم ذ تِيْمَسِّي ذِي أُرُوح، عَبْدَم أَرَبِّي، ¹²فارْحَم ذِي مِيْن تَرْجَام، ذِي لَحْصَارْت صِبَارْم، طَفْم ذِي تَزَالِيْت نَوْم لَبْدا. ¹³وُشْم أَفُوس ذِي مِيْن إِحْذَاجِن إِمَقْدَاسِن، رَكْرَم ذِي تَنُوجِيْت إِ إِبَارْأِيْبِيْن. ¹⁴بَارَكْم إِنِّي كَنْبُو إِمَارْتِن، بَارَكْم وار نَعْلَم شا. ¹⁵فارْحَم أَك-ذ إِنِّي إِفَارْحِن، رُوم أَك-ذ إِنِّي إِتْرُون. ¹⁶إِيْم س نِيْت ذ إِشْتِن أَك-ذ واياويا. وار تَشْغَلْم شا س تَمْسَلَايِن بُوْعْلَان ماشا رُوحْم أَك-ذ إِمِواضَعِن. وار تِيْلِيْم شا ذ إِمِيغِيْسِن أَك-ذ يِيخْف نَوْم. ¹⁷وار تَارِيْم شا حِدْخ لُغار س لُغار. حَضَام مِيْن إِشْنَان إِمَارًا إِوْذَان. ¹⁸مَلا تَرْمَارْم، مَشْحَال مَنا د إِتاسِن زَايُوم، صِلْحَم أَك-ذ مَارًا إِوْذَان. ¹⁹وار تَنْشِيْقِيْم شا، أ إِمِيْعِيْن، ماشا وُشْم أَمَشَان إِ لُغَاضَاب مِيْنِزِي ثُورا ”تَقْمْت إِ نَش، نَش أَذ خَلْصَع“ إِقَار سِيْذِي. ²⁰مَلا إِلُوز لُغْدُو نَوْم، سَشْم ث، مَلا إِفُود، وُشْم اس أَذ إِسُو، مِيْنِزِي مَلا تَكْيِذ أَيَا، أَذ تِيَارُود إِفْضَاوِن إِحْدُوْدُوقِن خ وُزْلِيْف نَس، ²¹وار خَاك إِتْغَلِيْب شا لُغار، ماشا غَلْبْ خ لُغار س لُخَار.

أَسْوَاعِ إِإْتِي إِحْكَمِن

13 ¹كُول لُعْمَار أَذ إِواضِعِ إِصُولْطَا ن يَتِي إِحْكَمِن، مِيْنِزِي وار ذِيْن صُولْطَا مَغِيْر س أَرَبِّي، ذ تِيْتِي إِلان أَقا إِسْبَدْ إِنتت أَرَبِّي. ²خ وُيْتِي وَنِي إِ غَا إِمَعْلان أَك-ذ صُولْطَا، إِتْمَعْلان أَك-ذ مِيْن إِسْبَدْ أَرَبِّي، ذ يَتِي إِتْمَعْلان أَذ كَسِيْن لُحُوكْم نَسِن. ³ماشَا لُحُوكَام وار لِيْن إِتِيكُودِي ن لُخْذايِم إِصْبَحِن، ماشا إِ لُخْذايِم تِيْعَفَانِيْن. ما تَحْخَسْذ أَذ تِيْلِيْذ نَبْلا تِيكُودِي زِي صُولْطَا؟ أَكْ مِيْن إِشْنَان، أَذ اش يِيْلِي شَان زَايس، ⁴مِيْنِزِي نَتَا ذ أَمْسَحَارِن أَرَبِّي إِ لُفْضَل نَك. ماشا مَلا تَكْيِذ لُغار، كُود، مِيْنِزِي وار إِكْسِي شا سِيْف باطل وُومي نَتَا

ذ اَمْسَخَار ن اَرَبِّي، اَقَا اِنَمَّ س لغاضاب خ وني اِتَكْن لغار. ⁵ خَنِّي اِتْخَصَّ اَذ اس نطاع، وار اِلِّي خ سَبِيْت ن لغاضاب واه، ماشا عاوذ خ سَبِيْت ن تَنْفَسَشْت. ⁶ خَنِّي خ سَبِيْت-ا اَذ تَخْلَصْم ضَارِبَا وُيْمِي نَبِيْتِي ذ اِحْدَامَن ن اَرَبِّي اِحْطَان خ مان اَيَا سِيْمَانَت نَس. ⁷ وشم اِ مارا مِين ذ اسن اِتْخَصَّان: ضَارِبَا اِ وُنِّي وُيْمِي ذ ثُوسَا ضَارِبَا، لَخْلَاص اِ وُنِّي وُيْمِي ذ ثُوسَا لَخْلَاص، اَوْقَار اِ وُنِّي وُيْمِي ذ ثُوسَا وُوقَار، شَان اِ وُنِّي اِسْذَاهَلَن شَان.

سِيارَضَم اِخْف نَوْم س سِيذِي يَشُو لَمْسِيح

⁸ وار تَكَمَّ اَمَارَاس غار حد مُغِير وُنِّي ن ثَايِرِي اَك-ذ واياويا، مِينَزِي وُنِّي اِتْخَسَن وَنْضَنِي، اَقَا اِكَمَل تاوراث. 'مِينَزِي ثِيَوْصَا 'وار زَنِّي'، 'وار نَق'، 'وار تيشار'، 'وار شَهْد زور'، 'وار تاسم'، وُشا مالا ذِين شا ن ثُوَصِيْت نْضَنِي، اَقَا-ثنت مُوننت ذَكْ وَاوَال-ا اَذ تَخْسَد اَمْقَارَب نَك اَمَشْناو اِخْف نَك!'. ¹⁰ ثَايِرِي وار تَضَارِي شا اَمْقَارَب. س وُيْنِي ثَايِرِي نَتَاث ذ لَكِمَال ن تاوراث. ¹¹ اَقَا نَسَن لَوْقْث، بَلِّي لَحُو ذ ناساعْت جِيْمَا اَذ نفاق زَكْ اِضْص. اَقَا لَحُو اَسْنَجْم نَع يُوذس-د كَنَار زَكْ وَاْمِي نُومَن. ¹² علاين تَعْذُو لَيْكْث، اِوض-د وُزِيل. خ وُيْنِي اَذ نَسَارَس لَحْدَايِم ن ثَالَسْت، اَذ نَكْسِي لَسْنَاخ ن ثَفَاوْث. ¹³ اَذ نُوِيور س وُشُووَار اَحْمِي ذ اَزِيل، وار اِلِّي ذَكْ وُزَارَن ن لَفْسَاذ ذ وُغَلِّي وُلا ذِي شَهَوَاث ن اَرَبِيْمْث ذ وُفَشُوْر نَبِغ ذَكْ وُمنغِي ذ لَحْسَد، ¹⁴ ماشا اَرْضَم سِيذِي يَشُو لَمْسِيح، وار تَكَمَّ طَوَع اِ وِيسُوم خ سَبِيْت ن نَشَوَاث.

وِي اِضْعَفَن ذ وُنِّي اِجْهَدَن

14 اِوِي اِضْعَفَن ذِي لِاِيْمَان، قِبَلَمْ ث، ماشا وار اِلِّي جِيْمَا اَذ ثَحَارَشَمْ ذَكْ اِخَارِيَصَن. ¹ اَقَا وُنِّي يُوْمَنَن اَذ اِشْ كُولِشِي، ماشا وُنِّي اِضْعَفَن اَذ اِشْ سَبِيْتِي وَاها. ³ وُنِّي اِتْنَن، وار اِسْحَقَارِي وُنِّي وار اِتْنَن، ذ وُنِّي وار اِتْنَن، وار اِحْكَمْ خ وُنِّي اِتْنَن، مِينَزِي اَرَبِّي اِقْبَل اِث. ⁴ مِين تَعْبِيذْ شَكْ وُنِّي اِحْكَمَن خ اِسْمَعَن وَنْضَنِي؟ ما اِبْدْ نَبِغ اِوُضَا، ذ مان اَيَا اِ باب نَس. ماشا اَذ اِبْدْ، مِينَزِي اَرَبِّي اِزْمَار اَذ اِث اِسْبَدْ ذ اِبْدِي. اَقَا ذِين حد اِتْغِيل اس اَقَا ذِين اَسْ سَتَج اِ وَاَسْ نْضَنِي، ذ وَنْضَنِي اِتْغِيل اس اَقَا كُول اَسْ كِيْفَكِيْف. اَجْ كُول اِجْن اَذ اِنْعِذْ ذِي لِبَال نَس نِشَان. ⁶ وُنِّي اِوَقَارَن اِج ن وَاَسْ، اِ اَرَبِّي اِث غَا اِوَقَار. وُنِّي وار اِوَقَارَن اَسْ، اِ اَرَبِّي اِ وار ث اِوَقَار. وُنِّي اِشِين، اَذ اِشْ اِ اَرَبِّي، مِينَزِي اَذ اِشْكَار اَرَبِّي. وُنِّي وار اِشِين شا، اِ اَرَبِّي اِ وار اِشِي شا وُشا نَتَا اَذ اِشْكَار اَرَبِّي عاوذ. ⁷ مِينَزِي وُلا ذ اِجْ زَانِبْغ اَقَا اِ اِدَار اِ بِيخْف نَس، وُلا ذ اِجْن مَّا اِمُوْث اِ بِيخْف نَس.

⁸ مِينِزِي مالا نندار، اذ نندار اِ اَرَبِي، نِيغ مالا نَمُوْث اذ نَمْت اِ اَرَبِي . مالا نندار نِيغ نَمُوْث، اَقَا نَشِين اِ اَرَبِي . ⁹ مِينِزِي اِ وُيَا اِ اِمُوْث لَمَسِيح، خَنِي اِ كَار-د وُشَا اِ ذُوْل اِ دَار عاوَد، جِيما اذ اِحْكَم خ اِنِي اِمُوْثَن وُلا خ اِنِي اِ دَارن . ¹⁰ ماشا شك، مايَمِي اِ غَا ثَحْكَمْد خ وُماش؟ نِيغ مايَمِي عاوَد ثَحْحَقَارَاذ وُماش؟ مِينِزِي نَشِين مَارَا اذ نَبْد قِيْبَالْت اِ لُكُوْرِسِي ن شِرَاع ن لَمَسِيح . ¹¹ اَقَا ثُوْرَا

”نش دَارغ، اِقَار اَرَبِي، اِنش اذ اَضَارن مَارَا اِفَادَن،
كُوْل اِلْس اذ اِشْهَد اَقَا نش ذ اَرَبِي .“ اِشا . 23:45

¹² خَنِي كُوْل اِجَن اذ اِكْت لِحْسَاب خ اِخْف نَس قِيْبَالْت اِ اَرَبِي . ¹³ اَج اَنغ وار نَحْكَم اِجَن خ وَنْضِينِي، ماشا حَسَن اذ ثَحْكَمْد اَمُو: وار ثَكِيْد شَا اَزْرُو ن وُنْقِرَاض نِيغ مِين ذِي اِ غَا اِنْدَرَف وُما . ¹⁴ نش سَنغ، اَقَا تَوَاسَقْنَع ذِي سِيْذِي يَشُو، بَلِي وُلا ذ اِشْت ن لِحَاجْت ثَحْمَج س بِيخْف نَس، مَغِيْر اِ وَنْي ت اِحْسَبَن ذ لِحْمَج، اَقَات اِنْتَا وَاها وُمي ثَحْمَج . ¹⁵ مالا اِحِيْق وُماش خ سَبِيْت ن ماشا، اَقَا شَك وار ثُوِيُوْرْد عَاذ ذِي ثَايِرِي . وار تَحِي شَا س ماشا نَك وَنْي اِخْف اِمُوْث لَمَسِيح . ¹⁶ مِين اِلَان ذ لُخَار اِ شَك، وار ثَجِي حُد اذ خَاس اِسُوْل س لُغَار . ¹⁷ مِينِزِي ثَاكَلْدِيْث ن اَرَبِي وار ثَلِي ذِي ماشا ذ ثِيْسِيْث، ماشا ذِي ثَسْكِنْدَا ذ لُهِنَا ذ لُفْرَاْحْت س اَزُوْح اِقْدَسَن . ¹⁸ مِينِزِي وَنْي اِسْتَحَارَن اِ لَمَسِيح ذِي مَان اَيَا، اَقَا يَارِضَا اَرَبِي وُشَا نَتَا ذ اَمَقْبُوْل غَار اِوُذَان . ¹⁹ اذ نَضْفَار خَنِي مِين اِلَان اِ لُهِنَا ذ لَبْنِي ن اِجَن اِ وَنْضِينِي . ²⁰ وار تَارْدَلْ شَا لُخْدَمْت ن اَرَبِي خ سَبِيْت ن ماشا . مَارَا ثِيْمَسَلَايِيْن اَقَا-ثَنْت ذ ثِيْمَزْدَاكْت، ماشا وُشْت خ بِنَاذَم وَنْي اِ غَا اِكْت اَزْرُو ن وُنْقِرَاض س ماشا نَس . ²¹ مَلِيْح وُمي وار تَنْتَد شَا اَيُسُوْم وُلا وار نَسَسَنْد شَا بِنُو، نِيغ وار تَنْكَدْ وُلا ذ اِشْت ن لِحَاجْت اِ ذَايَس اِ غَا اِنْقَارِض نِيغ اِتْوَاْحِيْق وُماش نِيغ اِ زِي اِ غَا اِتْوَاضَعَف . ²² ما ذَايَك اِ لِيْمَان؟ اذ اِش يِيْلِي اِ بِيخْف نَك زَاث اِ اَرَبِي . سَعْدَن وَنْي وار اِتْمَشَارَاع اَك-ذ بِيخْف نَس ذِي مِين ذ اِس اِنْغِيْل مَلِيْح . ²³ ماشا وَنْي اِتْشَكَاَن خَوِي اِتْت، اِتْوَاْحَاَسَب، مِينِزِي مَان اَيَا وار اِلِي زِي لِيْمَان . قَاغ مِين وار اِلِيْن زِي لِيْمَان، اَقَات ذ ذَاْب .

¹ ماشا نَشِين اِنِي غَار اِلَا جَهْد، اِنْتَحَص اَنغ اذ نَارْبُو ثُوَضَعَفْت ن بِنِي وار غَار اِلِي جَهْد، وار د نِيْوِي شَا اَرْضَا اِ بِيخْف نَغ . ² كُوْل اِجَن اذ اِسَارِضَا اَمَقْرَاب نَس اِ ثَشُوْنِي ذ لَبْنِي . ³ مِينِزِي لَمَسِيح عاوَد وار اِسَارِضِي شَا اِخْف نَس، ماشا اَم مَامَش ثُوْرَا

”ثيڤكورا ن يني اِشك اِكوران، وُضانت-يد خافي.“⁴ مينزي مارا مين ثورا قبل، ثورا اِ
 وُسلمدنغ، جيما س صبار ذ وُشجع س مين اِلان ذڭ اِذليس اِذ غارنغ بيلي وُسيشم.
 5 اِربي ن صبار ذ وُشجع اِذ اوم اِوش جيما اِذ ثخارصم كيفكييف جاراوم علاحساب
 لمسيح يشو،⁶ جيما س اِج ن اِراي ذ اِشت ن ثوميجا اِذ سَمغارم ذي اِربي، باباس ن
 سيدينغ يشو لمسيح.⁷ خ وُيني قبلم اِجن ونضني، اَم مامش ذ انغ اِقبل لمسيح عاوذ
 اِ وُغولي ن اِربي. 8 اِذ انيغ، اِقا لمسيح يشو اِذول ذ اِمسحار ن وختان ذي طوع ن
 ثيذت ن اِربي، جيما اِذ اِضمن لُوغوذ اِ الجذوذ⁹ وُشا جيما لڭنوس اِذ سَمغارن ذي
 اِربي خ سبيث ن اِرحمت اَم مامش ثورا ”س وُيني اِذ شهذغ خاك جار لڭنوس وُشا اِذ
 حمدغ اسم نك س اِزلان.“¹⁰ اِقار عاوذ ”فارحم، اِ لڭنوس، اِك-ذ وُندوذ نس.“¹¹ عاوذ
 ”حمدم اِربي، اَم مارا لڭنوس، سبم ث، اَم مارا اِيدوذن.“¹² عاوذ اِشاعيا اِقار ”اِذ بيلي
 وُزوار ن ياسا وُشا ذ وُني د اِكارن جيما اِذ اِحكَم خ لڭنوس، اِذ ذانس بيلي وُسيشم ن
 لڭنوس.“¹³ اِربي ن وُسيشم اِذ كنيو اِشور س لفراحت ذ لهنا ذي لايمان جيما اِذ نقيضم
 س وُسيشم زي جهذ ن اِروح اِقدسن.

بولوس ذ اَمسيار ن تسخارث ن لمسيح اِ مارا لڭنوس

14 نش سيمانت اِنو تواسقنغ زي جهث نوم، اِ اَوماثن، اِقا كنيو نعامرم س ثشون،
 ثشورم س مارا تاموسنا، جيما اِذ اِعلم اِجن ونضني. 15 ماشا زڭ وُغزديس اِقا وُريغ اوم
 س ثزياسث كتار، اِ اَوماثن، ماحند اِذ كنيو سَعقلغ زي سبيث ن نيعمت اِذ اِبي اِموشن
 زي اِربي،¹⁶ جيما اِذ اِليغ ذ اَمسيار ن يشو لمسيح اِ لڭنوس ماحند اِذ خدمغ اَم وُكهان
 اِ لخبار اِصباحان ن اِربي، جيما اِذ ثيلي ناغارصث ن لڭنوس ذ تامقبولت، ثنواقدس
 س اِروح اِقدسن. 17 اِقا غاري اِغولي ذي لمسيح يشو زي جهث ن ثيمسلايين اِ غارس
 غار اِربي. 18 مينزي وار زعمغ اِذ سولغ خ شا وار زابي ث اِكي لمسيح، جيما اِذ طاعن
 لڭنوس س واول ذ لخدمت،¹⁹ س جهذ ن لعلامات ذ لموعجيزات وُشا س جهذ ن
 اِروح اِقدسن اِ ل اِغا كملغ اِبارح ن لخبار اِصباحان ن لمسيح زڭ وُرشاليم ذ لضرُوف
 نس اِل اِليريكون. 20 اَمو ثوغا اِروغ س مزي اِذ بارحغ، وار اِلي ماني اِتواسما لمسيح
 قبل جيما وار بنينغ خ ذساس ن ونضني،²¹ ماشا اَم مامش ثورا ”اِني وار زابيس اِتوabarحن
 اِذ زارن، ذ بيني وار خاس اِسلايين اِذ فهمن.“²² س وُيني ثوغا وار زمارغ اِطاس ن اِمورن
 ماحند اِذ غاروم-د اسغ.

بُولُوسِ اِگَّا اَذِ يَارْزَفِ غَارِ لُمُومِينِ ذِي رُوما

²³ ماشا لُخُو، وُمي وار غاري بُو ومشان عاذ ذِي جوايه-ا وُشا وُمي ثوغا عاوذ خَسغ اَذِ غاروم-د اسغ اَطاس ن اِسكُوسا زكُ وامبي، ²⁴خمي اِ غا راحغ غار سبانيا، اَذِ غاروم-د اسغ. مينيزي سَيِشِغ اَذِ كُنِيو زارغ خُمي خاوم-د اِ غا كَغ ذِ اَبْرِيذُ وُشا كُنِيو اَذِ ابي تَسَقَبْصَم غار ذِيئِي، خُمي اِ غا فُوجغ ذِ اَمزوار اَكِيذُوم شا ن لُوقْت. ²⁵ ماشا لُخُو اَقَّا رُوحغ غار وُرشاليم جِما اَذِ خَدَمغ اِ اِمَقْداسن. ²⁶ مينيزي ثوغا يارضا اِ ماسِيذُونِيَا ذِ اَخايا اَذِ كُن شا ن ثُويزا اِ اِمزلاض جار اِمَقْداسن اِنِي اِلان ذِي وُرشاليم. ²⁷ ثوغا اَرْضان خ مان اَيَا، ماشا ثوغا عاوذ ذائسن ذِ امارواس. مينيزي مالا ثوغا لَكُنُوس شارشن ذِي مين غارسن غار وُذيان خ لِحساب ن اُرُوح، اِنخَصَّ اَسَن اَذِ ثن خدمن عاوذ س مين غارسن خ لِحساب ن ويثُوم. ²⁸ خومي اِ غا كَمَلغ مان اَيَا وُشا اَذِ اسن سِيوضغ لُغِيَلْت، اَذِ ذِ خاوم كَغ ذِ اَبْرِيذُ خُمي اِ غا راحغ غار سبانيا. ²⁹ نش سَنغ بَلِي مالا وُسيغ-د غاروم، اَذِ د اسغ س لُمُود اِسُورن س لباراكان لَخبار اَصْبَحان ن لَمَسِيح. ³⁰ تارغ زايوم، اَوُوماثن س سِيذِيئِغ يَشُو لَمَسِيح وُشا س ثايرِي ن اُرُوح، اَذِ ثَبَدَم نِيشان اَكِيذِي ذِي ثُرالِيث غار اَرَبِي خ سَيِث اِنُو، ³¹ جِما اَذِ توافكغ زكُ اِنِي وار يومينن شا ذِي ياهُودِيَا، جِما اَذِ ثِيلِي تَسْخارْت اِنُو اِ وُرشاليم ذِ ثامقُبُولْت غار اِمَقْداسن، ³² جِما اَذِ غاروم-د اسغ شُورغ س لَفراحت س ثمخسا ن اَرَبِي وُشا اَذِ اَرِيغغ اَكِيذُوم. ³³ اَرَبِي ن لَهنا اَذِ كيوم يِيلِي مارا اِذُوم. اَمِين.

اَسَلَم اَنكَارُو

16 اوصِغ كُنِيو زِي جِيهْت ن وُلْتمانغ فُويي، ثِي ذِ ثامسْخارْت اِ ثَمسْمُونْت ذِي كِينخَرِيَا، ² جِما اَذِ زايَس ثارْحَبم ذِي سِيذِي اَم مامش اِثَلِيق اِ اِمَقْداسن وُشا اَذِ ت نعاونم ذِي مين ما نَحداج زايوم، مينيزي اَقَّا نعاون اَطاس وُلا لا ذِ نش. ³ سَلَم خ بريسكِيلا ذِ اَكُويلا، اِخداَمن اَكِيذِي ذِي يَشُو لَمَسِيح، ⁴ اِنِي اِسْبَلن اِخف نسن خ سَيِث ن ثُودارْت اِنُو. وار لِيغ ذِ نش واهَا وِتي ثن اِنقادان، ماشا مارا اِثِمسْمُونِين ن لَكُنُوس. ⁵ سَلَم عاوذ خ ثَمسْمُونْت ثِي ذِي ثادارْت نسن. سَلَم خ اِبانيشُوس، اَمعِيز اِنُو، وِتي ذِ اَمزُون اَخايا اِ لَمَسِيح. ⁶ سَلَم خ ماريم ثِي ثوغا ثامار اَطاس خاوم. ⁷ سَلَم خ اَنْدُرُونِيكُوس ذِ يُونياس اِنِي زِي ثَقِيْبَلْت اِنُو ذِ اِنِي ذِ اِمْحباس اَكِيذِي، اَقا-ثن ذِ اِرِيازن اِنُواسنن جار اِمازانن، ثوغا-ثن ذِي لَمَسِيح قَبْل خافي. ⁸ سَلَم خ اَمبَلِيياس، اَمعِيز اِنُو ذِي سِيذِي. ⁹ سَلَم خ وُربانُوس، اَخداَم اَكِيذِي ذِي لَمَسِيح ذِ اَسْتاخيس اَمعِيز اِنُو. ¹⁰ سَلَم خ اَيِيليس وِتي اِبانن

ذَأَمَقَلَبْ ذِي لَمَسِيح. سَلَمَم خِ أَئِثْبَاب نِ ثَادَارْت نِ أَرِيسْتُوْبُولُوس. ¹¹ سَلَمَم خِ هِيرُودِيُون
وَنِي زِي ثَقَبِيلْتِ إِنُو. سَلَمَم خِ أَئِثْبَاب نِ ثَادَارْت نِ نَارِكِيْشُوس إِنِّي إِلَانِ ذِي سِيْذِي.
¹² سَلَمَم خِ ثَارِيْفِينَا ذِ ثَارِيْفُوسَا ثِيْتِي إِتَامَارِنِ ذِي سِيْذِي. سَلَمَم خِ بَارِيسِس، أَمَعِيْرَ، وَنِي
إِتَامَارِنِ أَطَاسِ ذِي سِيْذِي. ¹³ سَلَمَم خِ رُوفُوسِ وَنِي إِتَوَاحْضَارِنِ ذِي سِيْذِي وَلاَ خِ مَاسِ ذِ
يَمَا إِنُو. ¹⁴ سَلَمَم خِ أَسِينِكْرِيْثُوس، فليْكُون، هيرماس، باثروياس، هيرميس وُشَا خِ وَاوَمَاتِنِ
إِنِّي أَكِيْسِن. ¹⁵ سَلَمَم خِ فِيلُولُوعُوسِ ذِ جُولِيْبَا ذِ نِيرِيُوسِ ذِ وِلْتَمَاسِ ذِ وُلِيمَبَاسِ ذِ مَارَا
إِمَقْدَاسِنِ إِنِّي أَكِيْذَسِن. ¹⁶ سَلَمَم خِ وَايَاوِيَا سِ وُشُودَمِ إِقْدَسِن. ثِيْمَسْمُورِنِنِ نِ لَمَسِيحِ مَارَا
تَسَلَامَتِ خَاوَم.

¹⁷ تَتَارَغ، أَوُومَاتِنِ، أَدْ ثَحْضَامِ زِي وَيِ إِتَكْنِ أَمَسْبُضِي ذِ ثَعِينَكْرِيْفِينِ سِ لَعَكْسِ نِ
ثَغُورِيِ إِثْغَرِيْمِ وُشَا بَعْدَمِ خَاسِنِ ¹⁸ مِينِزِيِ أَمَشْنَاوِ إِنَا وَا رِ خَدَمِنِ شَا سِيْذِيْثَنَغِ يَشُو لَمَسِيحِ،
مَاشَا أَعْدِيْسِ نَسِن. سِ لِحْرُوضِ إَصْبَحِنِ إِرُوقِنِ خَدَعِنِ وُلاوِنِ نِ إِنِّي إِهْدَنِن. ¹⁹ مِينِزِيِ
طَاعْتِ نَوْمِ تَوَاسِنِ غَارِ مَارَا. سِ وُيُنِّيِ فَارِحَغِ زَايَوْمِ، مَاشَا خَسَغِ أَدْ ثِيلِيمِ ذِ إِيْمِغِيْسِنِ ذِي
ثَشُونِيِ وُلاَ ذِ إِقْوَبَانِيْنِنِ إِلْغَارِ. ²⁰ أَرِّيِ نِ لَهْنَا أَدْ إِثْحَا شَيْطَانِ سَادُوِ إِضَارِنِ نَوْمِ ذَغِيَا. تَعِمَعْتِ
نِ سِيْذِيْثَنَغِ يَشُو لَمَسِيحِ أَدْ كِيَوْمِ ثِيلِيِي. أَمِينِ.

²¹ إِتْسَلَام-دِ خَاوَمِ ثِيْمُوثِيُوسِ وَنِي إِيْحَدَمِنِ أَكِيْذِيِ وُلاَ ذِ إِنِّي زِي ثَقَبِيلْتِ إِنُو:
لُوكِيُوسِ ذِ يَاسُونِ ذِ شُوسِيْبَاثْرُوس. ²² نَش، ثَارِثِيُوسِ، وَنِي يُورَانِ ثَابْرَاتِ-أِ، تَسَلَامَغِ
خَاوَمِ ذِي سِيْذِي. ²³ إِتْسَلَام-دِ خَاوَمِ خَايُوسِ وَنِي زَايِيِ يَارْحَبِنِ وُلاَ زِي ثَمَسْمُونَتِ
مَارَا. إِتْسَلَام-دِ خَاوَمِ إِرَاسْتُوسِ وَنِي خِ صَنْدُوقِ نِ ثَنْدِيْنَتِ ذِ كُورَاطُوسِ، وُمَاتَنَغِ.
²⁴ تَعِمَعْتِ نِ يَشُو لَمَسِيحِ أَدْ كِيَوْمِ ثِيلِيِي مَارَا. أَمِينِ. ²⁵ وَنِي إِرْمَارِ أَدْ كَنْبُوِ إِسْجَهْدِ
عِلَاحْسَابِ لِحْبَارِ أَصْبَحَانِ إِنُو ذِ وُبَارِحِ نِ يَشُو لَمَسِيحِ، عِلَاحْسَابِ أَسَارْكَابِ نِ
سَيِّرِ وَنِي ثُوغَا إِنُوفَارِنِ ذِكِّ إِكُودِنِ نِ لُوقْتِ نِ لِبْدَا ²⁶ مَاشَا أَقَا إِتَوَاسْضَهَار-دِ لِحُوِ
وُشَا إِتَوَاسْشِنِ إِ طَاعْتِ نِ لَإِيْمَانِ إِمَارَا لِكْنُوسِ سِ إِذْلِيْسِنِ إِقْدَسِنِ نِ إِمْكَاشَاْفِنِ
عِلَاحْسَابِ لُومَارِنِ أَرِّيِيِ وَنِي إِلَانِ إِلْبَدَا، ²⁷ أَقَا إِرِّيِيِ وَنِي ذِ بَابِ نِ ثِيْغِيْثِ وَخَدَسِ،
إِنَّا وُيِيِ إِ غَا يِلِيِيِ وُغُولِيِ سِ يَشُو لَمَسِيحِ إِلْبَدَا قَاعِ. أَمِينِ.